

Hebreos

Goãtm̄ maḡm̄ Goãtm̄ yare werem̄ marire

¹ Iribojegue Goãtm̄ masare weren̄gap̄m̄. Īgm̄ bajasuburi mari ñes̄m̄ s̄marãre iribojegue majarãre Īgm̄ gamerire werem̄rip̄m̄. Īgm̄ yare werem̄htanirã mera erãre werem̄rip̄m̄ Īgm̄. Gajirãre Īgm̄ dehyoa werem̄rip̄m̄. Gajirãre Īgm̄ bocatĩriro werem̄rip̄m̄. Gajirãre quẽroque werem̄rip̄m̄. Erop̄a werem̄rip̄m̄ Īgm̄ mari acawererãre. ² Dohpaguere pehreburiñ coregã árĩrin̄urire Īgm̄ maḡure Īgm̄ yare Īgm̄ weredore obeocũ Īgm̄m̄ marire wereami. Jesucristo Īgm̄ Paḡm̄ iidorero mera i yebare ñmaro sãre iidigm̄m̄ árĩmi. Īgm̄ Paḡm̄m̄ pehreuriñ árĩcũ árĩpehreuri opabure apip̄m̄ Īgm̄ure. ³ Eropigm̄m̄ Īgm̄ maḡm̄m̄ Īgm̄ Paḡm̄ ñarire opaḡm̄m̄ árĩgm̄m̄, Īgm̄ turari mera marire ii ĩhmudi árĩmi. Eropigm̄m̄ yujuro mera Īgm̄ Paḡm̄ mera árĩgm̄m̄, Īgm̄ Paḡm̄m̄ árĩric̄urire marire ĩhmudi árĩmi. Eropigm̄m̄ Īgm̄ turari mera Īgm̄ dorecũ i yeba, ñmaro sã erop̄a árĩniguia. Eropiro dederebeaa Īgm̄ dorerĩ mera. Eropigm̄m̄ mari ñero iirare Īgm̄ coera p̄h̄m̄ Īgm̄ Paḡm̄m̄ turatarigm̄m̄ diayer̄m̄ doap̄m̄ Īgm̄ op̄m̄ Īgm̄m̄ árĩr̄ire ĩhm̄bu.

Goãtm̄ maḡm̄ anyua tauro ãhrimi

⁴ Īgm̄ Goãtm̄ maḡm̄ waĩc̄m̄i. Erop̄a waĩc̄gm̄m̄ gajirã tauro op̄m̄ ãhrimi. Eropigm̄m̄ Īgm̄ anyua weca tauro op̄m̄ ãhrimi. ⁵ Īgm̄ anyuare Goãtm̄ ne ñpa

arĩ werebirimuripũ ĩgu magure werediro dopa ta:

Yũ magũ āhraa mũhũ. Dohpagāre mũre dehyoacũ iiabũ, arĩpũ Goãmũ ĩgu magure.

Anyuarũre ne eropa arĩ werebirimuripũ. Eropigũ erāre i sāre ne werebirimuripũ:

Īgu pagũ āhraa yũhũ. Eropigũ ĩgu yũ magũ árĩgũcumĩ, arĩpũ Goãmũ ĩgu magure.

Anyuarũre ne eropa arĩ werebirimuripũ. Eropigũ ĩgu magũ anyua tauro árĩpũ. ⁶ Eropigũ gajisubu ĩgu magure masa dehyoagure i yeba apõpa aigũ õpa arĩpũ Goãmũ ĩgure:

Árĩpehrerã yaharã anyua yũ magure mereja, ĩgure umupearãcoma erã, arĩpũ ĩgu.

⁷ Eropigũ ĩgu anyuarũre werebu õpa arĩpũ ĩgu: Yaharã anyuare miruñe iro dopa dũpũcũrãre iiaa yũhũ. Erã yũ pohro majarã āhrima. Eropigũ erāre peame iro dopa árĩcũ iiaa yũhũ, arĩ werepũ Goãmũ mari Pagũ.

⁸ Erāre ĩgu eropa arĩqueregũ ta ĩgu magurũre õpa arĩpũ:

Mũhũ Goãmũ árĩpehrerã tauro opũ eropa árĩniguicãgũca. Diaye ta doregũca mũhũ mũ yarāre. ⁹ Diaye árĩrire, õaro iirire turaro gahmea mũhũ. Eropigũ ñero iirire gamebeaa mũhũ. Mũhũ eropa árĩgu árĩcũ ĩagũ, yũhũ mũ Pagũ árĩpehrerã gajirã tauro mũre mucubiricũ iiabũ, arĩpũ Goãmũ.

¹⁰ I sāre arĩpũ ĩgu ĩgu magure “Opũ,” arĩ piyugũ: Opũ, negohraguere i yebare, umaro sāre ĩhacũnugubũ mũhũ. ¹¹ Iri árĩpehreri pehrea waroca. Mũpũ

eropa árĩniguigũca. I yeba árĩpehreri suhriro iriĩne boaro dopa ta pehrea waroca. ¹² Iri árĩpehreri i yebare umaro sãre gohrotocũ iigũca mũhũ. Mũraĩne suhrirore mũ cohã gajiĩne mera gohrotoro dopa ta árĩpehrerire gohrotocũ iigũca mũhũ. Mũpũ mũ árĩdiro dopa árĩniguicãgũca. Eropigũ ne gohrotosome. Eropa árĩniguigũca mũhũ, arĩpũ Goãmũ ĩgũ magũre.

¹³ Gajisubu õpa ĩgũ magũre arĩgũ iri sãre anyuapũre ne werebirimũripũ Goãmũ:

Yũ diayerũ doaque mũhũ. Eropigũ mũre ĩhaturirãre tarinũgabasadoregũra. Eropigũ erã weca opũ árĩque mũhũ, arĩpũ Goãmũ ĩgũ magũre.

¹⁴ Árĩpehrerã anyuapũ Goãmũ pohro majarã dihta aħrima. Eropiro Cristo ĩgũ taumorãre itamudoregũ Goãmũ obeomũrimi erãre.

2

Goãmũ yare õari buherire marire eropa pepibiricãro gahmea

¹ Eropigũ Goãmũ magũ gohra marire weregũ ĩgũ árĩcũ masirã ĩgũ wererare mari peerare õaro guĩaro gahmea marire irire cãdijiri arĩrã. ²⁻³ Anyua masare erã wererare masapũ erã tarinũgacũ ĩagũ Goãmũ masare dipuwaja moapũ. Eropigũ erã anyua werera iri diaye árĩcũ ĩhmugũ ĩpũ. Eropiro anyua erã werera iri diaye árĩcũ marire irire peero gahmea. Erã tauro Cristopũre peero gahmea marire. ĩgũ

mari Opu ĩgu marire tauborore weremũhtarũ. Eropirã ĩgure peenirãpu ĩgu wererare marire wereturiañorã marire õaro masicũ iirã. Eropigu iri buherire “Jesucristo marire ĩgu taugacumi,” arĩ buherire mari eropa pepicãcũ Goãmũ marire dipuwaja moagacumi. ĩgu dipuwaja moaborore duhrimasibea mari. ⁴ Irire peemũhtanirã erã buhe weca peoro watope Goãmũpu iri buherire diaye ta árĩcũ ĩhmudi árĩmi. Eropigu erã irire buherã ĩgu turari mera baja deyoro moari erã ii ĩhmucũ iri buherire diaye ta árĩcũ ĩhmudi árĩmi masare. Eropigu ĩgu Espĩritu Santo mera iri buheri diaye ta árĩcũ ĩhmudi árĩmi. Espĩritu Santo Jesu yarãre yujurãyerire Goãmũ yare erã mohmemasiburire apidi árĩmi erã game itamuboro dopa. ĩgu gamediro dopa ta apidi árĩmi erã mohmemasiburire erãre.

Jesucristo mari iro dopa ta dũpũcũgu masa dehyoapu, arĩ gojañumi

⁵ I mũũ pehrerinũ árĩcũ Goãmũ pohro árĩrã tauro oparã árĩsome anyuapu. Erãre oparã acusome Goãmũ. ⁶ Anyuare oparã acubiriquerecũ Goãmũ yare weremũhtadigu õpa arĩ gojañumi iribojeguerẽ Goãmũ ĩgu oparã acumorãre:

Gua masa bu gohra gua árĩrã árĩquerecũ ta guare guña mũhũ. Gua masare õaro árĩcũ iiaa mũhũ. ⁷ Bajamenũrigã anyua doca masare apiyoro mũhũ. Eropa apiqueregu ta guare turari ogũ oparã acuyoro mũhũ. ⁸ Mũhũ eropa acucũ i yeba maja weca árĩpehreri weca ãhraa gua masa, arĩ gojañumi iribojegue majagu mari Pagure.

Goãmũ masare apigu i yebaguere árĩpehrerã waimũrã sãre masa dorero doca árĩmorãre apiñumi. Masare igũ eropa oparã acuquerecũ ta erã waimũrãre árĩpehrerãre doremasibeama dohpa. ⁹ Jesupũ árĩpehrerã weca opũ ãhrimi. Bajamenũrigã anyua doca mari Pagũ igũ sãre apipũ. Mari yañe árĩborañere sĩribasabure igũre eropa apidi árĩmi. Mari Pagũ marire mahigu Jesure mari ya árĩburire igũ sĩricũ gamerũ. Eropigu igũ eropa sĩricũ ãagũ igũre turarire ogũ, opũ acupũ igũre pare árĩpehrerã igũre umupeoborore.

¹⁰ Goãmũ árĩpehrerire ãhacũnuguñumi. Eropiro árĩpehrerĩ igũ ya dihta ãhraa. Eropigu Jesure sĩridoregũ masa erã ñerire cãdijicũ iipũ igũre. Ìgũ masa bajarã igũ porã árĩmorãre umarogue òarogue aĩgãbu eropa iipũ. Ìgũ eropiicũ tamera òapũrica. Eropigu Jesupũ marire taugũ mari opũ ta ãhrimi. ¹¹ Árĩpehrerã masa erã ñerire cóãdi árĩmi Jesucristopũ. Eropigu igũ ñerire cóãnirã mera Pagucũmi Goãmũre. Eropigu mari Pagũ yujugũ ta ãhrimi. Mari Pagũ igũ árĩcũ Jesu marire igũ ñerire cóãnirãre “Yũ acawererã ãhrima,” arĩ piyugũ ne guhyasĩribeami. ¹² Òpa arĩgũ iipũ igũ Pagure:

Mũ árĩricurire weregura yũ acawererãguere.

Árĩpehrerã yaharã gamenererã pohro mũre umupeogũ “Turagũ ãhrimi,” arĩ weregura yũhũ erãre, arĩpũ igũ igũ Pagure, arĩ gojara ãhraa.

¹³ Eropigu òpa arĩpũ daja:

Yũ Pagure guñaturagũca yũhũ, arĩpũ, arĩ gojara
ãhraa.

I sãre arĩpũ ãgũ Jesucristo:

Ohõ ãhraa yũhũ. Goãmũ porã ãgũ yũre apinirã
yũ acawererã mera ohõ ãhraa, arĩpũ ãgũ.
Ãgũ yarãre “Yũ acawererã,” arĩ piyugũ
eropa arĩpũ.

¹⁴ “Yũ acawererã,” ãgũ arĩ piyurã dũpũcurã
mari árĩcũ ãagũ, Jesupũ mari ya dũpũ mari
iro dopa árĩgũ arĩpũ. Eropa árĩgũ arĩgũ ãgũ
crusague sĩrigũ arĩpũ watĩre dederecũ iibu. ãgũ
watĩpũ sĩridoregũ ãhrimi marire. ¹⁵ Eropa ii
ãgũre dederecũ iidi árĩmi marire tauboro dopa.
Marĩpũ ũmũri nũcu mari sĩriborore gũirĩbũ.
Eropa gũirã gũiro doca árĩrã, ñero sĩporãcurã
árĩribũ mari. Eropa árĩrã mari árĩcũ ãagũ
ãgũ marire taumi. ¹⁶ Eropa taugũ anyuapũre
itamugũ arĩbirĩpũ ãgũ. Abrahã pãramerãre
marĩpũre itamugũ arĩpũ. ¹⁷ Eropĩgũ ãgũ mari
acaweregũ iro dopa arĩpũ. Yujuropa ta mari
iro dopa ta dũpũcũgũ arĩpũ. Eropa arĩgũ mari
masa ya árĩburire sĩribasagũ mari ñeri iirare
Goãmũre cóãdoregũ arĩpũ. Eropĩgũ pahia oparã
erã Goãmũ ya árĩburire serẽbasaro dopa ta õaro
itamuboro dopa mari iro dopa dũpũcũgũ arĩgũ
iĩpũ. Erã tauro marire ãgũ mojomoro ãhami.
Eropĩgũ marire õaro itamuniguicãmi. ¹⁸ ãgũ
ñero tarĩpũ. Eropĩgũ watĩ ãgũre ñero iidorerĩpũ.
Iĩbirĩpũ ãgũ. Eropa ñerire tarĩnũgadĩgũ árĩgũ,
ãgũ mari sãre ñerire tarĩnũgacũ iimasimi. Watĩ
ãgũ ñerire iidorecũ ãagũ marire ñerire iĩbirĩcũ
iimasimi.

3

Jesu Moise tauro árĩgũ árĩcũ ĩarã ĩgũre bũrigã

¹ Jesu ĩgũ eropa árĩgũ árĩcũ ĩarã ĩgũre bũrigã guñaque mũa. Ƴũ acawererã, Jesu yarã, Goãmũ ĩgũ yarã árĩmorãre mũare beyedigũ árĩmi ĩgũ. ĩgũ Jesupũ Goãmũ ĩgũ apidigũ árĩgũ mari pahia opũ ãhrimi. I yeba majarã pahia oparã tauro ĩgũpũ mari ya árĩburire Goãmũre serẽbasagũ ãhrimi marire. Eropirã ĩgũre ôaro guñaque mũa umupeodigũre. ² Goãmũ ĩgũre marire ĩgũ tauborore ĩgũ apicũ ĩgũpũ ĩgũ apidiro dopa ta iipũ. Ne tarinũgabiripũ. Moise sã iribojegue majagũ Goãmũ yarã Israe masare itamugũ ne tarinũgabiripũ. Eropa ta iipũ Jesu sã. ³ Eropiro Moisere erã umupeodiro tauro Jesupũre umupeoro gahmea marire. Ôpa ãhraa iri. Wihire mari “Ôari wihi ãhraa,” arĩro tauro wihire iidigũpũre “Ôapũricãmi,” arĩro gahmea marire. Eropigũ Jesupũ wihi iidigũ iro dopa ãhrimi. ĩgũ eropa árĩgũ árĩcũ ĩgũpũre Moise tauro umupeoro gahmea marire. ⁴ Masapũ wirire iirã ãhrima. Goãmũpũ árĩpehrerire iigũ ãhrimi. ⁵ Moisepũ Goãmũ mohme coregũ árĩgũ Goãmũ ya curu majarãre itamuniguigũ árĩmũripũ. Pũhrũgue Goãmũ ĩgũ masare wereborore weremũripũ masare. ⁶ Cristopũ Goãmũ magũ árĩgũ ta, Goãmũ yare iiniguicãgũ árĩgũ Goãmũ ya curu majarã tauro opũ ãhrimi. Eropirã Moise tauro Cristopũre umupeoro gahmea marire. Eropirã maripũ Cristore guñatura duhubirã árĩrã marire ĩgũ tauborore eropa mucubiri coreniguicãrã ĩgũ ya curu majarã ãhraa mari.

Goãmũ ãgu yarãre ãgu mera õaro soocũ gameñumi

⁷ Eropirã Jesucristore mari umupeo duhubiri-borore õpa iro gahmea marire. Irire weremi Espíritu Santo Goãmũ yare gojarapũguere.

Dohpagãre yũhũ Goãmũ mũare yũ werecũ yũhridiagirã árĩbircãque mũa. ⁸ Eropirã õaro yũhrique yũre mũa. Iribojegue Israe masa masa marirogue árĩrã yũ werequerecũ ta umupeodiagirã yũre yũhribirimũrĩma. Eropa iirã yũre ãhasũabircũ iima. Eropirã erã iidiro dopa iibircãque mũapũ yũre. ⁹ Eroguere cuarenta bojori gohra erãre deyoro moarire ii ãhmuribũ erãre itamuũ. Yũ eropa ii ãhmuquerecũ ta erãpũ õpa arĩ pepimũrĩma yũre dũyasorã. “Goãmũ marire itamumasisome,” arĩ pepimũrĩma. Eropa arĩ pepirã ñero iimũrĩma. ¹⁰ Erã eropiicũ ãagu erã mera guabũ. Eropa guagu õpa arĩbũ: “Erã yahare peediagirã gajiropa árĩri buherire eropa guñamaacãrã ãhrĩma,” arĩbũ. “Yahapũre ne buhedibeama,” arĩbũ erãre. ¹¹ Eropigu erã mera guagu õpa arĩ werebũ: “Erã yũ mera majarã ne árĩsome. Eropirã yũ mera õaro soosome erã,” arĩ werepũ Goãmũ.

¹² Eropirã, yũ acawererã, õaro iique mũa Goãmũre cohmore arĩrã. Mũa ñerire pepirã, Goãmũ ojocarĩguere “Diaye iimi ãgu,” arĩ umupeobirã, ãguere cóãboca mũa. Ne yujugu mũa mera majagu eropa iibircãporo. ¹³ Eropirã

ipure iiro gahmea: Mũa mera majarã umuri nũcũ Goãmũ yare mũa basi game werenigu-ique ñerire iiri arĩrã. Ñerire iirã “Iri mera mucubiria,” arĩrã, gũyarire pepirã iiaa mari. Eropa pepibiricãque. Ñeripure iiniguirã Goãmũ yapure sũabeaa mari. Eropa iirã ñerire duhudiabirã wahaa. Eropa iiri arĩrã mũa mera majarãre Goãmũ yare mũa basi game werenigu-ique. Jesucristo ãgũ dujariboro core eropa game werenigu-ique. ¹⁴ Eropirã negohrare Cristore mari umupeonũgadiro dopa ta eropa ta mari umupeoniguicãrã, mari ojocarioropẽ ãgũ yare duhubirã ãgũ mera majarã ãhraa.

¹⁵ Goãmũ yare erã gojarapũ yũ dohparagã werediro dopa werea daja mũare Goãmũ wereniguirire:

Dohpagãre yũhũ Goãmũ mũare werecũ õaro yũhrique mũa yũre. Iribojegue majarã Israe masa erãre yũ werequerecũ ta umupeodiabirã yũre yũhridiabirima. Eropirã erã iidiro dopa iibiricãque mũa, arĩmi Goãmũ, arĩ gojañuma iribojegure.

¹⁶ Eropirã Goãmũ ãgũ wererare peenirã árĩquererã erã ãgũre yũhribirimuriñorã. Erã árĩpehrerã Egiptogue ñero tarinirãre Goãmũ Moise mera ãgũ wiunirã árĩñorã. Erã eropa árĩquererã ãgũre ne yũhribiriñorã. ¹⁷ Eropigu erã ñero iicũ ãagũ cuarenta bojori gohra Goãmũ erã mera guapũ. Erã ñero iira dipuwaja erogue masa marirogue erãre dujadorepũ. Eropirã erore sĩria wamuriñorã erã. ¹⁸ ãgũre erã eropa yũhridiabicũ ãagũ õpa gũhyadiaro mera arĩpũ

ĩḡũ: “Erã yũ mera majarã ne árĩsome. Eropirã yũ mera ne ðaro soosome erã,” arĩpũ ĩḡũ.
 19 ĩḡũ eropa arĩcũ peerã ire masia mari: Erã Goãmũre erã umupeobiriri waja, ĩḡũ mera majarã árĩmasibiriñorã. Eropirã ĩḡũ mera ðaro soomasibiriñorã.

4

1 Eropigũ iribojegue majarãre ĩḡũ mera ðaro erã sooborore gameḡũ erãre “Yũ mera soorãca,” arĩ apipũ Goãmũ. Mari sãre eropa ta arĩ apipũ ĩḡũ. Eropirã ḡũhyadiaro mera Goãmũre ðaro yũhrirã mari wieri marigue arĩrã. Eropa wierã ĩḡũ mera ðaro soosome mari. 2 Iribojegue majarã Goãmũ yare erã peediro dopa ta mari sã ðari buherire peebũ. Erãpũ peerã “Goãmũ diaye iĩḡũ ãhrimi,” arĩ pepibirimũriñorã. Goãmũre umupeobirimũriñorã. Eropiro Goãmũ yare peequererã yũhribiricũ erã peera ñehe árĩburi árĩbiriyoero erãre. 3 Maripũ ĩḡũre umupeorã dihta Goãmũ mera majarã árĩrãca. Eropirã ĩḡũ mera ðaro soorãca. Goãmũ ðpa arĩpũ:

Erã mera guagũ ḡũhyadiaro mera ðpa arĩ werebũ: “Yũ mera ne soosome erã,” arĩ werebũ, arĩyoro Goãmũ yare erã gojarapũgue.

Eropa arĩpũ ĩḡũ. I yebare ĩḡũ ĩhacũnugura pũhrũ soorpũ ĩḡũ. Eropigũ masa sã ĩḡũ mera sooborore amuyupũ. Amuquereḡũ erãpũre “Yũ mera ne soosome erã,” arĩpũ Goãmũ. 4 Seis nũri ĩḡũ ĩhacũnugura pũhrũ ĩḡũ soorare ðpa arĩ gojañuma Goãmũ yare erã gojarapũgue:

Seis nuri pührü árĩpehrerire ĩgu iirare pehogu,
Goãmü mohmeduhu soopü, arĩ gojañuma
ĩgu yare erã gojarapũgue.

⁵ Eropiro Goãmü yare erã gojarapũ õpa arĩ werea
daja ĩgu mera õaro árĩbirinirãre:

Yü mera majarã ne árĩsome erã. Eropirã ne yü
mera soosome, arĩpü Goãmü.

⁶ Eropirã õari buherire peemühtanirã, ĩgure
erã tarinũgara dipuwaja ĩgu mera majarã
árĩbirã ĩgu mera soobiriñorã erã. Gajirãpü
ĩgu mera majarã árĩrãcoma. ĩgu mera soorã
árĩrãcoma. ⁷ Eropigü masa ĩgu mera õaro
árĩburire erã ĩgu mera sooburire apigü daja,
“Dohpaguere ähraa,” arĩ apipü Goãmü. Israe
masa Goãmure erã tarinũgara pührü baja bojori
pührü irire weredorepü Davire. Davi were
gojarare müare weretuhajaqueregü weregüra
daja yühü. Eropigü õpa arĩ gojañumi Davi
Goãmü wereniguirire:

Dohpagãnure yühü Goãmü müare yü weresã,
tarinũgaro mariro õaro yührique müa
yure, arĩ gojañumi iribojegüere.

⁸ Ero coregue Josué Israe masare Goãmü ĩgu ora
yebague aĩ ejarü. “Yü mera soorã árĩrãcoma,”
arĩgu iri yebague erã sooborore arĩgu iibiripü
Goãmü. Iri yeba soodoregü gajinü erã sooburire
apibiriboñumi ĩgu. ⁹ Seis nuri pührü i yebare
ĩgu iira pührü Goãmü ĩgu mohmeduhu sood-
iro dopa ta mari ĩgu yarã sã ĩgu mera mari
sooburiñe ähraa. ĩgu mera mari õaro árĩburiñe
ähraa. ¹⁰ Eropigü Goãmü soogu, ĩgu mohmerare
duhucãnipü. Eropa ta ĩgu mera soorã mari

gamero mera iirire duhucārāca. ¹¹ Eropirā mari ĩḡu yarā ōaro iirā. Goāmũ yare ōaro yũhrirā ĩḡu mera mari sooboro dopa. Iribojegue majarā mari acawererā erā tarinũgara pũhrũ Goāmũ mera majarā ne árĩmasibirimũriñorā erā. Erā iidiro dopa iibiricārā mari.

¹² Goāmũ ya wereniguiri marire Goāmũ mera ōaro árĩniguicũ iiaa. Ōaripũre marire gohro-tocũ iiaa. Eropiro ĩḡu ya wereniguiri bu árĩri árĩbeaa. Eropiro matamiji pepũripũ usirimiji mera dirore erā wiri ĩha erā masiro dopa ta, ĩḡu ya wereniguiri mari árĩricũre mari pepirire ōaro masicũ iiaa marire. Eropa masirā mari iiricari ōaro árĩcũ, ōaro árĩbiricũ sãre masia ĩḡu wereniguirire peerā. Iri mari buhecũ mari árĩricũre ōaro masipehocũ iiaa marire. ¹³ Ne Goãmũre mari árĩricũre mari iirare duhmasi-beaa mari. Árĩpehrerire ĩḡu ĩhacũnugurare ĩḡu ĩhacũnugunirā sãre ĩhami ĩḡu. ĩḡu tamerare mari iirare mari pepirire werepehorāca mari.

Jesu turagũ mari pahia opũ āhrimi

¹⁴ Jesu Goāmũ magũ ĩḡu sĩrira pũhrũ ĩḡu Pagũ pohrogue dujadigũ árĩmi. ĩḡu turagũ mari pahia opũ āhrimi. Eropigũ mari ya árĩburire Goãmũre serēbasami. ĩḡu eropa árĩḡũ árĩcũ ĩarā maripũ ĩḡu yare ōaro yũhrirā árĩrā ĩḡure ōaro umupeoniguicārā. ¹⁵ ĩḡu Jesucristo mari pahĩ árĩḡũ mari ñero taricũ ōaro mojomoro ĩagũ āhrimi. Mari ñerire ƚaribejarire masimi ĩḡu. Watĩ árĩpehreri ñerire ĩḡu marire iidorero dopa ta Jesu sãre ñerire iidoreripũ. ĩḡu eropa

iidorequerecũ ĩgu ñerire iibiripũ. ĩgu eropa ñerire iidorerire iidoredigu árĩgu marire mojomoro ĩagu marire itamumasimi. ¹⁶ Eropirã “Yũre yũhrigucumi,” arĩrã Goãmũre serẽrã. ĩgu marire mahimi. Eropigu mari ĩgũre serẽcũ marire mojomoro ĩagu marire itamugucumi. Eropigu mari ñero iidiacũ sãre ĩgu marire itamugucumi.

5

¹ Árĩpehrerã pahia oparã, masa mera majarã ãhrima. Beyenirã ãhrima erã mera majarã yare Goãmũre serẽbasamorã. Eropirã masa ñerire erã iira dipuwajare Goãmũre serẽbasama erã mera majarãre. Eropa serẽbasarã waibugũre wejẽ soe mujuma Goãmũre. ² Pahia oparã gajirã masa iro dopa õaro masipehobirã ãhrima. Gajisubu õarire iibirã ãhrima erã sã. Eropa masibirã arĩrã gajirã masibirãre itamumasima nijiyajaro mera. Eropirã õarire iibirã sãre õaro mera itamumasima. ³ Eropirã õaro masipehobirã ñeri iira dipuwajacũrã ãhrima erã sã. Eropirã erã basi erã ñerire erã iira dipuwaja waibugũre wejẽ soe mujuma Goãmũre. Gajirã masa ya arĩburire erã ñeri iira dipuwaja erã serẽbasadiro dopa ta, erã basi erã ya arĩburi sãre serẽma Goãmũre.

⁴ Eropigu ĩgu ĩgu gamero pahia opu ñajabeami. Goãmũpũ ĩgũre beyegũ, pahia opu acumi. Iribojegue majagũ Aarõ mũrũre ĩgu apidiro dopa ta gajirã pahia oparã sãre apimi ĩgu. ⁵ Eropa ta Cristo sã ĩgu basi ĩgu gamero

pahia opu ñajabiripu. Goãmuru ñgure opu acugu ðpa arĩpu:

Yu magu ãhraa muhu. Dohpagãre mure de-hyoacũ iibu yuhu, arĩpu Goãmu.

⁶ Gajisubu ðpa arĩpu Goãmu Cristore:

Árĩpehrerinũre pahi árĩniguicãgũca muhu. Melquisede ñgu árĩdiro dopa ta pahi árĩniguicãgũca muhu, arĩpu ñgu magure.

⁷ Cristo i yeba árĩgu burigã gaguinigu, co deco mera Goãmure turaro serẽpu ñgu, “Yure masuque,” arĩgu. Mari Pagupu Goãmuru ñgure sĩridigure masumasigu arĩpu. ñgu eropa serẽcũ Goãmu peepu ñgure. Goãmu gameri dihtare ñgu iidiacũ ñagu Goãmuru ñgu serẽrare peegu yuhipu. ⁸ Eropigu Cristo Goãmu magu árĩqueregu ñero taripu ñgu. Eropa ñero tarigu yuhipu Goãmure. Eropa yuhipu ðaro yuhririre masituhapu. ⁹ Eropa yuhridigu crusague sĩrigu masa erã ñerire cãdijigu árĩpehrerã ñgure yuhrirãre taubu wapu. ¹⁰ Eropigu Goãmuru ñgure pahia opu masa yare serẽbasabure apipu. Eropigu Melquisede pahia opu ñgu árĩdiro dopa ta ãhrimi Cristo.

Cristo yarã ñgure umupeo duhucũ gũhya ãhraa

¹¹ Baja ðpa árĩre muare werenemodiaa gũa. Gũa eropa werenemodiaquerecũ ta mupu peediabirã ãhraa. Eropirã muare gũa werecũ mmasumasigu arĩpu. ñgu eroasiya mara.

¹² Yoari boje Cristo yarã árĩraa mua. Eropa árĩrã dohpaguere gajirãre buherãgue árĩboca mua. Mua eropa árĩbonirã árĩquerecũ ta gajirã

m̄ap̄ure buherãcoma. Goãm̄u yare m̄uare buhem̄htarare m̄uare buhero gahmea daja. Ne buhen̄ugarã iro dopa ta ãhraa m̄ua. ¹³ Ap̄ico mihrirã majirãgã ár̄nima. Erã iro dopa ta m̄ua sã ãhraa õaro masibirã ár̄rã. “I ñeri ãhraa. Ip̄u õari ãhraa,” ar̄i ãha masibea m̄ua. ¹⁴ Barire barãp̄u m̄urã ãhrima. Erã iro dopa ár̄rã õaro buhenirã õaro pepi masirã m̄ua ár̄icũ õaboaya. “I ñeri ãhraa. I õari ãhraa,” m̄ua ar̄i ãha masirã ár̄icũ õaboaya.

6

¹⁻² Eropirã Goãm̄u yare õaro masirã, õaro yuhrirã ár̄rã. Cristo yare negohraguere buhen̄ugarã õpa masin̄ugabu mari: Mari gamero mera mari iiri duhpiburi ár̄ibeaa. Mari iiri mera tarisome mari. Tarimorã Goãm̄ure umupeoro gahmea marire. Ire negohraguere buhen̄ugama marire. Eropirã marire waĩyema. Mojotorire marire erã duhpeorire buhe, s̄irinirã erã masa m̄uriborore buhe, i um̄u pehrera p̄hr̄u Goãm̄u ãgu dipuwaja moaborore buhe, ãgu dipuwaja moamorã erã ñero tarinigui-boro sãre buhe, i sãre marire negohraguere buhen̄ugama. Eropa ár̄ri buherire mari masituhajarare buhenemobirã gaji buherire õaro buhenemorã. ³ Eropirã Goãm̄ure, ãgu ya sãre masinemorã. Goãm̄u ãgu gamecũ eropa ta iirãca mari.

⁴ Goãm̄u yare masinirã irire duhurãre ne dipaturi erãre erã ñeri iirare erãre bujawerecũ iimasiya mara daja. Eropa ár̄rã, Cristo ãgu taunirã ár̄rã Esp̄iritu Santore oparima. ⁵ Eropirã

Goãmũ ya wereniguirire peerã õari wereniguiriri iri árĩcũ masirima. Eropirã pehrerinũ puhrugue Goãmũ ãgũ turari mera mari eropa árĩniguiaborore, masare ãgũ dipuwaja moaboro sãre erã masirima. ⁶ Eropã árĩrã Cristo yare erã duhurã Goãmũ magure dipaturi crusague erã pabiadiro dopa ta ãgũre iirã iima. Erã eropiicũ ãarã gajirã masa Cristore wereyama. Eropirã dipaturi erãre, erã ñeri iirare erã bujawere õarire gohrotocũ iimasiya mara. ⁷ Õpa ãhraa iri mari werenigui queori mera buhecũ: Õari yebare wũaro deco aricũ erã oteri õaro puhri ducacũ. Eropigũ iri pohe opu ducare opami ãgũ baburire. Iri yeba õari yeba árĩcũ ãha mucubirimi. Eropã ta Goãmũ iimi ãgũ yare peenirã sãre. Erã ãgũ yare õaro iicũ ãha mucubirimi erã mera. ⁸ Gaji yebapũ añapora mera, taa mera iri yeba tiaro duhpiburi yeba árĩbeaa. Eropã árĩri pohere cóãcãro gahmea. Eropã ta Goãmũ iimi ãgũ ãgũ yare peequererã iibirãre. Erãre dipuwaja moa peamegue cóãgũcumĩ.

Cristore eropa umupeoniguirãre taumi Goãmũ

⁹ Yũ mahirã, mũare eropa arĩ werequeregũ ta mũapũre “Cristore duhuristo yare erã duhurã Goãmũ mã ãhraa,” arĩgũ iibeaa. Mũapũ Cristo ãgũ taurã ãhraa. Eropirã õarire iirã iica mũa. Irire masia yũhũ. ¹⁰ Mari õaro iira waja Goãmũ queoro marire õaro iigũ ãhrimi. Eropigũ ãgũ ya árĩburire mũa turaro mohmerare cãdijisome ãgũ. Mũa ãgũre mahirã ãgũ yarãre itamuabu mũa. Dohpague sãre erãre itamuniguia mũa. ãgũre mũa eropa mahirare cãdijisome ãgũ.

11 Mũa ojocariniguiçãropẽ gajirãre mũa umupeocũ, mũa itaisto yare erã duhurã Goãmũa mmuniguicũ sãre gahmea gũa. Mũa eropiicũ ïagu õaro iigucumi mari Pagũa mũare. 12 Eropirã mũa tericurã árĩcũ gamebeaa gũa. Gajirã Cristo yarã ñero tariquererã Goãmũare “Ïgu diaye ta árĩgu ãhrimi,” arĩ umupeoniguicãma. Erã eropiicũ ïagu Goãmũa “Masare õarire ogura,” ïgu arĩdiro dopa ta erãre opehogucumi. Eropirã mũa sã erãre ïhacũrã erã iro dopa ta iiniguicãque.

13-14 Iribojegue Goãmũa Abrahãre õpa arĩ apipũ: “Yũ waĩ mera diaye ta ire arĩgu iiaa mũare. Mũare õaro iigura. Eropigu mũ pãramerã árĩturiarãre bajarã masa árĩcũ iigura,” arĩ werepipũa Goãmũa. Eropa arĩ werepigũa ïgu ya waĩ mera waĩpeopũa. Gajigu ïgu tauro árĩgu ne maricũ ïgu ya waĩ mera eropa waĩpeopũa. 15 “Mũare õaro iigura,” Goãmũa ïgu arĩ apirare Abrahãpũa õaro ïgu umupeoyura pũhrũa Goãmũa ïgu arĩdiro dopa ta ïgure õaro iipũa. 16 “Goãmũa mera diaye arĩgu iiaa,” masapũa arĩrã, erã erã tauro árĩgu waĩ mera waĩpeorã iima. “Goãmũa mera diaye arĩgu iiaa yũhũa,” yujugu ïgu arĩcũ gajigu peegu “Diaye ãhraa,” arĩgucumi. Dũyasomasibeami. 17 Eropigu Goãmũa Abrahãre “Mũare õaro iigura,” arĩ apigu “Yũ waĩ mera diaye ta arĩgu iiaa,” arĩ waĩpeopũa. Ïgu eropa waĩpeo wererare peerã “Diaye ta ãhraa iri,” arĩ masia. Eropirã “Ïgu arĩrare ne gohroto-some,” arĩ masia mari. Irire mari masiboro dopa ïgu arĩ apira mera ïgu waĩpeogũa eropa werepipũa. 18 Eropigu ïgu arĩ apira mera, ïgu

waĩpeora mera diaye ĩgu arĩrare masicũ iipũ Goãmũ marire. Eropiro ĩgu waĩpeocũ ĩgu arĩ apira ne gohrotosome. Eropigũ Goãmũ ne guyabeami. ĩgu eropa árĩgu árĩcũ masirã, mari marire ĩgu tauborore mucubiri corerãca, “Eropa ta iigucumi,” arĩrã. ¹⁹⁻²⁰ Eropa ĩgu tauborore corerã guñaturarã ãhraa mari. Eropa árĩrã “Mari sĩrirã Goãmũ pohro warãca,” arĩ masirã güibeaa. Pahia opũ Goãmũ ĩgu árĩri taribu gohrague ñajagu, cãhmotariñe suhriro pohecague tariñajami. Eropa ñajagu masa ya árĩburire serẽbasami Goãmũre. ĩgu eropiidiro dopa ta Jesu sã Ɂmarogue Goãmũ árĩroque ñajamũhtadi árĩmi. Eropa ñajamũhtagũ mari sãre erogue ñajaburire ahmu serẽbasami. Eropigũ árĩpehrerinũri nũcũ serẽbasagu iimi pahia opũ árĩgu. Melquisede pahi ĩgu árĩdiro dopa ta pahia opũ ãhrimi ĩgu Jesu.

7

Melquisede pahi ĩgu árĩdiro dopa ta Jesu pahia opũ ãhrimi, arĩ gojañumi

¹ Melquisede iribojegue majagu Salem waĩcũri maca majagu opũ árĩmũripũ. Eropigũ pahi árĩgu Goãmũ turagure Ɂmaro majagure masare serẽbasagu árĩmũripũ. Eropigũ gajirã oparãre Abrahã gamewejẽtuha, ĩgu dujaricũ gohra, Melquisede ĩgu ya maca árĩdigũ waha, Abrahãre bocatĩripũ. Eropa bocatĩrigũ ĩgure serẽbasapũ Goãmũre: “Õaro iique ĩre,” arĩ serẽbasapũ Abrahãre. ² Abrahãpũ ĩgu gamewejẽ tarinũgara pũhrũ gajirã oparã yare aĩ dujapũ. ĩgu eropa aĩ

dujarare merogã dũhapũ ãgu Melquisedere. Diez ãgu aĩ dujara áricũ yujuñe ópu Melquisedere. Melquisede ãgu waĩ mari ya mera arĩro “Tauro opũ ðaro iigu añhrimi,” arĩdiaro iiaa. Eropigu ãgu Salem waĩcũri maca majarã opũ ãgu áricũ iri maca maja waĩre waĩcũpu. Salem waĩ ðpa arĩdiaro iiaa: “Tauro opũ masare ðaro game mahicũ iigu añhrimi,” arĩdiaro iiaa. ³ Ne Melquisede pagũ sũmarãre, ãgu core árimũhtanĩrãre, ãgu acawererãre erã were gojatura mara. ãgu masa dehyoarare, ãgu sĩrira sãre were gojatura ne mara. Eropigu eropa áriniguigu iro dopa áripũ ãgu. ãgu eropa árigũ áricũ Goãmũ ãgu magũ ãgu pahi ãgu árirare marire buhemi. Melquisede pahi eropa áriniguigu iro dopa ta añhrimi ãgu Jesucristo Goãmũ magũ. ãgu iro dopa ta Cristo sã pahi árigũ eropa áriniguicãgu añhrimi.

⁴ Eropigu Melquisede turagu árirare guñaque. Abrahã mari ñecu mũru opũ gohra áriquerẽgu ta Melquisedepũre ãgu duja aĩrãre dũhapũ. Diez ãgu duja aĩra áricũ yujuñe ópu Melquisedere. Eropa ta ãgu duja aĩ ãgu dũharare ópu ãgure. ⁵ Eropiro Moise ãgu doreri mera áripẽhrerã gajirã Israe masare iripẽta wajayedorepu erã pahiare. Eropa doregu Levĩ pãramerã árituriarãre erã acawererã árituriarã erã wajayerire ñeadoregu apimũripũ. Levĩ pãramerã ya curu majarã pahia dihta wamũriñorã. Eropirã gajirã ya curu majarã sã Levĩ pãramerã mera Abrahã pãramerã árituriarã

árĩmuriñorã. Erã acawererã árĩquererã erã Leví pãramerãre wajayemuriñorã. ⁶ Melquisedepu Leví pãrami árĩturiagu árĩbiriqueregu ta wajaseapu Abrahãre. Eropigu "Mure òaro iigura," ĩgu Goãmu arĩ apidigu árĩqueregu Abrahãpu Melquisedere wajayepu. Eropigu Melquisedepu Goãmure Abrahãre serẽbasagu òaro árĩdoremuripu. ⁷ Òaro árĩdoregu Melquisedepu ĩgu òaro árĩdoredigu Abrahã tauro árĩpu. Irire mari òaro masia. ⁸ Mari mera majarã pahia marire merogã wajasearã mari iro dopa ta masa ãhrima. Eropa árĩrã sĩrimorã ta ãhrima erã sã. Ihĩ Melquisedepu iribojegue Abrahãre merogã wajaseadigu eropa árĩniguigu iro dopa ãhrimi ĩguapu. "Ĩgu sĩria wañumi," arĩ werera ne mara. Eropa ta ãhraa Goãmu yare erã gojarapũgue. ⁹ Dohpague majarã Leví pãramerã árĩturiarã pahia árĩrã masare merogã wajaseamurima. Eropa árĩrã erã árĩquerecũ ta Abrahã erã ñecu árĩgu Melquisedere merogã wajayegu árĩpehrerã Leví pãramerã ya árĩburi sãre wajayebasagu iimuripu. Eropirã Leví pãramerã sã Melquisedere wajayenirã iro dopa ãhrima. ¹⁰ Melquisedere Abrahã ĩgu wajayerasubure Levípu masa dehyoanibiripu dohpa. Eropa masa dehyoabiriqueregu ta ĩgu ñecu Abrahã dũpũgue ĩgu árĩbodiro dopa ta Levípu árĩtuhagu ĩpu. Eropigu Melquisede Abrahãre ĩgu bocatĩricũ Leví sã ĩgu ñecu mera ĩgu árĩboro dopa árĩgu ĩpu. Eropa árĩgu Leví, ĩgu pãramerã mera Melquisedere merogã wajayenirã iro dopa árĩrã erã ĩgu doca árĩrã

iiñorã.

¹¹ Īḡu dorerire apigũ Goãmũ Aarõ pãamerã árĩturiarã Leví ya curu majarãre pahia árĩdoremũripũ. Eropirã ĩḡu doreri dorediro dopa ta erã pahia waimũrãre soe mujurã masa ya árĩburire serẽbasamũriñorã Goãmũre. Erã pahia erã eropiiquerẽcũ masa Goãmũ mera õaro wamorã árĩbirimũriñorã dohpa. Erã pahia erã iira mera masa õarã wacũ Goãmũ erãre gohrotobure Cristore obeobiriboñumi. Eropigũ ĩḡu obeodigũ marire Goãmũ mera õaro árĩcũ iigũ aridi árĩmi Cristopũ. Īḡu Leví ya curu majagũ Aarõ mũrũ iro dopa árĩbiripũ. Melquisede iro dopa árĩpũ. ¹² Eropigũ pahiare gohrotogũ, marire doreri sãre gohrotoro gámemi ĩḡure. Pahia erã itamuri mera mari taribiro dopa ta iri doreri mera mari taribea. Eropiro iri dorerire gohrotopehoro gámemi. ¹³ Aarõ Leví sã, erã ya curu majarã dihtare pahiare acumũripũ Goãmũ ĩḡu dorerire apigũ. Īḡu eropa acuquerẽcũ ta dohpaguere mari Opũre Cristore pahire Goãmũ ĩḡu acudigũ gajĩ curu majagũ ãhrimi. ¹⁴ Īḡu mari Opũ Cristo Judá ya curu majagũ masa dehyoapũ. Moise pahiare acugũ, Judá ya curu majarãre ne acubirimũripũ. Irire õaro masia mari.

¹⁵ Ire masirã, õpa mari õaro masia: Dohpague ne ĩḡu acudigũ pahi Cristo Melquisede iro dopa árĩḡũ ãhrimi. ¹⁶ Iribojegue maja doreri dorediro dopa ta Leví ya curu majarã dihta pahia ñajamũriñorã. Jesucristopũ Goãmũ ne ĩḡu acudigũ gajirã pahia erã iro dopa pahi

ñajabiridigu árĩmi. Īgu Goãmũ turari mera árĩpehrerinũri árĩgu ãhrimi. Eropigu iri turari mera pahi ñajadi árĩmi ĩgu. ¹⁷ Ōpa ãhraa Goãmũ yare weremũhtanirã erã gojarapũgue:

Árĩpehrerinũrire pahi árĩniguigũca mũhũ. Melquisede ĩgu pahi ĩgu árĩniguiddiro dopa pahi árĩniguicãgũca mũhũ, arĩpũ Goãmũ ĩgu magũre, arĩ gojañuma iribojegũre.

¹⁸ Goãmũ ĩgu doreri Moiserẽ ĩgu apimũhtara doreri turari árĩbiribũ. Eropigu iri dorerire duhucãdi árĩmi Goãmũ. ¹⁹ Moiserẽ ĩgu apira doreri mera ne õaro tariburire opabirimũribũ mari. Eropigu dohpaguepũre Goãmũ marire ĩgu tauborore marire apidigu árĩmi. Īgu eropiicũ dohpaguere ĩgu pohrogue wamasia mari. Eropirã ĩgu mera wereniguimasia.

²⁰ Eropigu Cristore pahi acugũ, “Yũ waĩ mera mũre acugũ iiaa,” arĩpũ Goãmũ. Gajirã pahia ñajacũ ĩgu iro dopa waĩpeo acubiripũ erãre.

²¹ Cristopũ ĩgu Pagũ waĩ werepira mera pahi ñajapũ. Ōpa arĩ werepirũ ĩgu Pagũ Cristore:

Yũhũ mũ opũ yũ waĩ mera mũre weregũ di-aye weregũra. Eropigu ire ne gohrotoro mariro werea mũre. Árĩpehrerinũrire pahi árĩniguicãgũca mũhũ, arĩ werepirũ Goãmũ ĩgu magũre.

²² Eropa werepigu mama buherire marire apigu, marire ĩgu tauborore apigu iipũ. Iribojegũ maja doreri tauro mari õaro árĩborore apigu iipũ. Eropigu Goãmũ masare “Ōaro iigũra,” ĩgu arĩdiro dopa ta iibu, Jesure obeodigu árĩmi marire taubure. ²³ Árĩmũhtanirã pahia erã

sīricũ ĩarã gajirã gohroto ñajamuriñorã daja. Eropirã erã bajarã pahia wañorã. ²⁴ Jesupũ eropa árñiguicãmi. Eropirã ĩgũre gohrotorã ne marima pahia. ²⁵ Eropigũ ĩgũ eropa árñiguigũ, Goãmũre eropa serēbasaniguicãmi ĩgũ ĩgũ yarã ya árĩburire. Eropigũ Goãmũ mera erã eropa árñiguiboro dopa masare taumasimi ĩgũ. Árĩpehrerã ĩgũre umupeorã Goãmũ pohrogue warãca. Eropigũ Jesu ãhrimi ƣpũta marire taubu.

²⁶ Eropigũ Jesu ãhrimi mari pahia opũ. ĩgũ tamerare burigã gahmea mari. Ne ñeri dipuwaja marigũ ãhrimi ĩgũ. Eropigũ masa iro dopa ñerire iibiridi árĩmi. Eropigũ Goãmũ ĩgũre ñerã watope árĩdigũre aĩgũ, ƣmarogue api, árĩpehrerã gajirã tauro árĩgũ opũ acupũ. ²⁷ Gajirã pahia iro dopa árĩbeamĩ ĩgũ. Erãpũ ƣmuri nũcũ waibũgũre wejẽ, soe muju serēmũrima Goãmũre masa ñeri iira dipuwaja cãdijidorerã. Erã basi erã ñeri dipuwajare serēmũhtamũrima. Pũhrũ gajirã ñeri dipuwaja sãre serēbasamũrima erã. Eropirã erã bajasuburi eropa Goãmũre serēbasamũrima. Jesupũ pahi árĩgũ, yujusubu ta masa ñeri dipuwajare Goãmũre serẽpũ. ĩgũ waibũgũre wejẽbiri ĩgũ basi sĩridigũ árĩmi mari masa ñeri iira dipuwajare taubu. ²⁸ Goãmũ doreri Moiserẽ ĩgũ apira mũra pahia oparã ñajadorea. Eropa erã ñajaquererã, ñeri marirã árĩbeamã pahia ñajarã. Iri doreri pũhrũ Goãmũ ĩgũ magũre pahire acugũ “Diaye ta pahi árĩniguicãgũcumĩ,” arĩ acupũ. ĩgũpũ ñeri

mariro eropa árñiguicãmi.

8

*Goãtm̄ masare “M̄are tauḡra,” arĩ apir̄m̄
daja ĩḡm̄ Moiser̄e arĩ apir̄are gohrotoḡm̄. ĩḡm̄
tama apir̄are werebasaḡm̄ ãhrimi Jesu*

¹ Iri árĩpeh̄rer̄ire arĩ werer̄ã i tamerare m̄are arĩr̄ã iiaa: M̄are ḡm̄ werediḡm̄ pahia op̄m̄ ĩḡm̄ tamera mari yaḡm̄ gohra ãhrimi. Mari ya árĩbur̄ire Goãm̄ure serẽbasaḡm̄ ta ãhrimi. Ũmarogue Goãm̄m̄ turatariḡm̄ ĩḡm̄ op̄m̄ doaro pohro ĩḡm̄ diayer̄m̄ doami ĩḡm̄ Cristo mari pahia op̄m̄. ² Eropiḡm̄ Goãm̄m̄ wihi i yeba maja wihi, masa erã iira wihiḡm̄ mohmebeam̄i. Ũmarogue árĩri wihire mari Op̄m̄ ĩḡm̄ iira wihire Goãm̄m̄ ya árĩbur̄ire mohmebasami. Iri wihi tamera Goãm̄m̄ ya wihi gohra ãhraa.

³ Eropirã árĩpeh̄rerã i yeba majarã pahia oparã waimurãre wejẽ soe muju Goãm̄ure omur̄ima masa ñero iira dipuwajare cãdijidorerã. Eropa ta iimorãre apidiḡm̄ árĩmi Goãm̄m̄. Eropiḡm̄ mari yaḡm̄ pah̄i Cristo sãre apiḡm̄ eropa ta iidorep̄m̄. Eropiḡm̄ mari ñeri iira dipuwajare Jesucristo ĩḡm̄ basi s̄iridi árĩmi. ⁴ Moise doreri dorediro dopa ta i yebague pahia masa erã ñeri dipuwaja cóãbur̄ire mohmebasama. Eropirã i yebague pahia árĩtuhama. Erã eropa árĩtuhajacũ Jesup̄m̄ mari yaḡm̄ pah̄i i yeba árĩniguiḡm̄, pah̄i árĩbiriboñumi ĩḡm̄. ⁵ I yeba majarã pahia erã mohmerire i yeba maja wihi ta Goãm̄m̄ wihi mohmerã árĩtuhajama. Goãm̄m̄ wihi gohra ũmarogue

ãhraa. Eropiro Goãmũ wihi i yeba maja wihi ɯmaro maja wihi ñhacũ iira wihi ãhraa. Eropigũ Moise iri wihire i yeba maja wihire ñgũ moaboro coregã Goãmũ õpa arĩpũ ñgũre. “Ʋtãgũgue árĩgũ mũre yũ ñhmudiro dopa ta yaha wihire õpa iique. Yũhũ dorediro dopa ta yaha wihire queoro iique,” arĩmũripũ Goãmũ ñgũre. ⁶ Dohpaguepũre Jesu pahi árĩgũ ñgũre apira mohmeri i yeba majarã pahia mohmeri tauro õaro ãhraa. Bu gohra árĩbeaa. Goãmũ masare “Cristo mera mũare õaro iigũra,” ñgũ arĩ apira iribojegue maja doreri Moise doreri tauro õari ãhraa. Marire ñgũ arĩ were apira iri doreri tauro marire õaro árĩcũ iiroca. Eropigũ marire Goãmũ mera amubasagũ árĩgũ, Cristopũ gajirã tauro pahi ãhrimi.

⁷ Negohrague Moise dorera mera mari Goãmũ mera õamasibirimũribũ. Iri doreri mera mari õacũ gaji buherire apibiriboñumi Goãmũ. Iri doreri mera mari õacũ, “Cristo mera mũare õaro taugũra,” arĩ werebiriboñumi marire. ⁸ Iri dorerire erã bocatĩubirirare weregũ õpa arĩpũ ñgũ yarãre Israe masare:

Õpa arãa yũhũ mũa Opũ: “Õaro peeque. Pũhrũgue gaji buherire weregũra yaharãre Israe masare, Judá ya curu majarã sãre. ⁹ Iri buheri erã ñecũ sũmarãre erãre werepira iro dopa ne arĩsome. Yũ basi erãre Egipto yebague árĩnirãre wiugũ erãre werepiribũ. Yũ eropa arĩ werepirare tarinũgama erã. Erã eropiicũ ñagũ negohrare erãre yũ wererare duhcãbũ. ¹⁰ Eropigũ pũhrũgue

Israe masare õpa arĩ weregura: Yũ dorerire erãre guñacũ iigura. Erãre yũ dorerire yuhridiacũ iiguca. Eropigu yũ Goãmũ erã opu árĩgura. Eropirã erãpu yaharã masa árĩrãcoma, arĩ weregura. ¹¹ Eropirã irisubure erã mera majarãre erã acawererãre ne erã õpa erã basi game arĩsome: ‘Dohpaguere mari Opũre Goãmũre masique mũa,’ ne arĩ game buhesome. Erã árĩpehrerã yũre masituharãcoma. Majirãgã, mũrã sã yũre masirã dihta árĩrãcoma. ¹² Eropigu erã ñeri iirare cãdijiguca yũhũ. Eropigu erãre dipuwaja moasome yũhũ,” arãa yũhũ mũa Opũ, arĩpu Goãmũ ĩgu ya wereniguiiri erã gojarapũgue.

¹³ Eropa arĩgu mama buherire apigu, iribojegue maja dorerire duhucũ iigu iimi. Eropiro mũra doreri ĩgu duhucũ iira pũhrũ iri doreri mũra gohrotopehrea waro iiaa.

9

I yeba maja taribure umaro maja taribu sãre Goãmũre umupeori taribure werepũ

¹ Negohraguere Goãmũ ĩgu dorerire Moiserẽ apigu masa ĩgure umupeoburi sãre werepipũ. Eropigu Goãmũre erã umupeoburi wihi sãre iidore apipũ. ² Iri wihi waimũrã gasiri wihi árĩyoro. Pe taribu opayoro. Wũari taribu erã ñajamũhtari taribu Goãmũ ya taribu waĩcũyoro. Iri taribure erã sihãgori yucũ duhpeodigu árĩyoro. Eropárĩcũ mesa sã árĩyoro. Iri

mesa weca Goãmure erã ori pan peyayoro. ³ Gaji taribu suhri mera erã cãhmotara taribu árĩyoro. Iri taribu Goãmũ ìgũ árĩri taribu gohra waĩcũyoro. ⁴ Iri taribugue oro mera erã iira mesa, incienso erã soeri mesa árĩyoro. Eropiro oro õari mera erã sũra comoro ero oyayoro. Iri comoro waĩcũyoro Goãmũ arĩ werepira gojara dicũri comoro. Iri comoro pohecague dicũyoro. Yuju coro oro coro dicũyoro. Ìgũ masare ejo-rañegã mana waĩcũriñegã dicũri coro árĩyoro. Eropiro iri comoro pohecague Aarõ yagũ ìgũ tuadigũ pũcũdigũ árĩyoro. Eropiro pemiji utãmiji Goãmũ ìgũ doreri ìgũ gojatura mijiri iri comoro pohecague dicũyoro. ⁵ Iri comoro weca perã anyua wéanirã árĩñorã. Erã wéanirã Goãmũ ìgũ goesiriri mera, “Iri taribure ìgũ àhrimi,” arĩ werero iiyoro. Iri comoro buariñe erã quẽdupari mera buasũyoro. Iri comoro buariñe weca masa ñero erã iira dipuwajare cãdijidoregũ waimurã di Goãmure erã orare wejẽsiripeopũ pahi opũ. Iripẽta weregura i wihi majare dohpaguere.

⁶ Eropirã iri wihire eropa erã õaro erã amura pũhrũ pahia umuri nũcũ erã ñajajamũhtari taribu erã mohmerire iimuriñorã. ⁷ Eropigũ pahia opũpũ dihta gaji taribuguerẽ ñajapũ. Bopori nũcũ ìgũ iri taribure yujusubu ta ñajapũ ìgũ. Eropa ñajagũ erã wejẽdigũ waibugũ dire aĩ ñajagũ, Goãmure umupeopũ. Iri di mariro ne ñajabiripũ. Ìgũ basi ìgũ ñeri iira wajare, árĩpehrerã gajirã Israe masa erã ñero iira dipuwaja sãre cãdijidoregũ dire aĩ ñaja

apimuripũ ĩgu Goãmũre. ⁸ Árípehreri i mera Espírĩtu Santo marire õpa arĩ buhebu iimi: Iri wihi Moiserẽ ĩgu apira wihigue Goãmũre umupeoburi árĩrisubu masapũ Goãmũre umupeorã iri wihigue ñajamasibiriñorã. Pahia opũ dihta Goãmũ ĩgu árĩri taribu gohrague ñajamasimi masare serẽbasagũ. ⁹ I árĩpehreri Goãmũre umupeori wihi majare masare apira, marire dohpague majarã buheburi dihta árĩyoro. Pahia erã ñeri dipuwajare waimurãre wejẽra mera masa ne Goãmũ mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã. ¹⁰ Goãmũ Moiserẽ apira doreri deyoro maja iiri dihta ãhraa. Erã õpa baburi, erã õpa ihriburi, erã õpa coburi, erã õpa iiri dihta árĩyoro. Eropiro iri doreri marire õarã wacũ iibiriyoro. Goãmũ iri dorerire masa erã iiburire apiñumi Cristo ariboro core.

¹¹ Dohpague Cristopũ mari pahi opũ árĩgu arituhadĩgu ãhrimi. Eropigũ marire sĩribasara mera marire õarã wacũ iituhadi árĩmi. Eropigũ Goãmũre mari ñeri dipuwajare cóadoregũ Goãmũ árĩroque ñajaja i yeba maja taribure ñajabiripũ. Ũmaro maja wihi ñajapũ. Iri wihi i yeba maja wihi tauro ãhraa. Eropiro masa erã iira wihi árĩbeaa. ¹² Eropigũ Cristo umarogue Goãmũ ĩgu árĩro gohrague yujusubu ta mari ñeri dipuwajare ñajatupũ. Eropa ñajagũ cabritoa dire, wecua dire Goãmũ árĩri taribugue erã aĩ ñajaro dopa iibiripũ ĩgu. ĩgu basi sĩrigũ ĩgu di gohrare cóãgu árĩpehrerinũri Goãmũ mera mari õaro árĩniguicãborore iipũ.

13 Ñeri oparãre guhrraricũrãre coewearã erãre wejẽsiripeomũriñorã cabritoa di mera, wecũa di mera, wecũare erã soera niti mera. 14 Eropa iñnorã masa erã dupũre ñerire coewea cóãrã. Iri tauro Cristopũ ãgũ di mera mari pepirigue mari ñerire õaro coewea cóãcãdi árĩmi. Iri ñeri dipuwaja oparã peamegue wabonirã árĩribũ mari. Jesucristopũ ñeri marigũ árĩgũ ta ãgũ basi crusague sãrigũ Goãmũre ópũ. Espĩritu Santo eropa árĩniguigũ ãgũ itamuri mera eropa ópũ ãgũ ãgũ basi. Eropigũ ãgũ mari ñerire ãgũ coeweadĩ árĩmi, Goãmũ ojocarigũ ya árĩburire mari õaro iimasiboro dopa.

15 Eropigũ “Õpa mũare õaro iigura,” Goãmũ arĩ ãgũ mama werepidiro dopa ta Cristopũ iidigũ árĩmi. Eropa iidi árĩmi ãgũ Goãmũ ãgũ beyenirãre taubu. ãgũ eropa taucũ árĩpehrrerĩnũri ãgũ mera õaro árĩrãca mari ãgũ yarã. Eropirã Goãmũ ãgũ yarãre ãgũ oburire oparãca mari. Moise doreri dihta árĩcũ masa erã ñeri iira dipuwajacũrã árĩmũriñorã dohpa. Eropa ñeri iira dipuwajacũrãre taubu ãgũ crusague sãribasadi árĩmi. ãgũ eropa sãricũ mari ãgũ yarãre ãgũ oburire oparãca. 16-17 Õpa ãhraa mari masare. Yujugũ ãgũ sãriboro core ãgũ acawererã ãgũ yare aĩ gueremasibeama. Eropiro ãgũ oparire ãgũ acawererãre ãgũ oburire ãgũ gojatuyurapũ ãgũ sãriboro core iripũ wajacũbeaa dohpa. ãgũ sãricũ ãarã iripũ ãgũ arĩ gojadiro dopa ta ãgũ yare guererãcoma erã. 18 Eropa ta Goãmũ masare werepimũhtara Moiserẽ ãgũ apira doreri sãriro marĩro di cóãro mariro ne

duhpihuri árĩbiriyoro. Eropigũ waibũgũ dire Moise wejẽsirira pũhrũ ãgũ dorere diaye ta iigũ iipũ. ¹⁹ Eropigũ õpa iimũhtarũ Moise: Goãmũ ãgũ apira dorere masare werepehorũ. Pũhrũ cabritoa dire, wecũa dire deco mera morepũ. Eropigũ isopo waĩcũdigũ dũpũ mera oveja poari diari poari mera erã ñimurare turãpũ. Iri dũpũ mera dire yosogũ, Goãmũ dorere ãgũ gojarapũ weca wejẽsiripũ. Áĩpehrerã masa weca sãre wejẽsiripeorũ. ²⁰ Eropa iigũ õpa arĩpũ ãgũ: “Goãmũ marire ãgũ werepĩra ãgũ dorera i di mera iri diaye árĩcũ masia mari. I dire ãarã diaye ta ãgũ arĩdiro dopa ta ãgũ marire iiburire masia. Maripũre irire yũhridoremi,” arĩpũ Moise. ²¹ Eropigũ masare ãgũ iidiro dopa ta Goãmũ umupeori wihi waimũrã gasiri wihire, árĩpehreri iri wihi árĩri sãre wejẽsiripeorũ. ²² Eropa ta ãhraa. ãgũ doreri iri dorediro dopa ta baja ñerire di mera coeweadoreyoro. Eropigũ di cohoro mariro Goãmũ mari ñeri iirare ne cãdijisome.

Cristo ãgũ dire cóãgũ, ãgũ yarã erã ñeri iirare coewearũ

²³ Eropiro i yeba maja wihire, iri wihi árĩri sãre ñerire coewearo dopa ta waimũrã di mera wejẽsiripeomũripũ. Eropiro iri tauro umarogue wamorãre erã ñeri dipuwaja oparare coero gahmea. Eropiro waimũrã di tauro árĩgũ ya di mera erã ñerire coero gahmea. Eropirã Jesucristo ya di mera coenirã wabũ maripũ. ²⁴ Eropigũ Cristo mari ñeri iira dipuwajare Goãmũre cóãdoregũ Goãmũre erã umupeori wihi masa erã iira wihire

ñajabiripũ. I yeba maja wihi umaro maja wihi ñhacũ iira wihi ñhraa. Goãmũ ya wihi gohra umaro maja wihi ñhraa. Eropigũ mari ñeri iira dipuwajare cóãdoregũ Goãmũ árĩro gohrague ñajapũ Cristo. Umároque wapũ ĩgũ Goãmũ core mari ya árĩburire serẽbasabu. ²⁵ Pahia opũ bojori nũcũ Goãmũ ĩgũ árĩri taribugue erã ñeri iira dipuwajare cóãdoregũ ñajamuripũ waimurã di mera. Cristopũ siringũ ĩgũ dire cóãdigũ Goãmure mari ñeri iira dipuwajare cóãdoregũ erã iiro dopa bajasuburi ñajabiripũ. ²⁶ Bajasuburi ĩgũ dire cóãbu árĩgũ, i yeba árĩropẽ bajasuburi ĩgũ ñero siringuicãboñumi. Yujusubu ta dehyoapũ ĩgũ i yebaguere i umũ pehrerinũ coregã. ĩgũ dehyoagu ĩgũ yujusubu ta sribasara mera mari árĩpehrerã ñeri iirare cóãbu dehyoapũ. ²⁷ Árĩpehrerã mari masa sã yujusubu ta siringũca. Mari eropa siringũ pũhrũ, ñarãre, ñerã sãre beyegucumi Goãmũ. ²⁸ Yujusubu ta mari siringũ dopa ta Cristo sã yujusubu ta siringũ bajarã masa erã ñero iirare cóãbu. Pũhrũ dipaturi dujarigucumi. Mari ñerire cóãdigugue dujarigucumi. Eropigũ irire dipaturi cóãgũ arisome. Eropa arigũ mucubiriri mera ĩgũre corerãre taugũ arigucumi. ĩgũ pohroque erãre aĩgãbu arigucumi.

10

¹ Moise doreri pũhrũ Cristo masare ĩgũ ñaro iiburire ñhmura dihta árĩbũ. Eropiro Cristo masare erã ñeri iirare ñaro cóãboro dopa iri doreri erã ñerire cóãmasibiriyoro dohpa. Eropiro iri doreri iri iidorero dopa

ta pahia bojori n̄c̄u Goãm̄ure waim̄urãre wejẽ, soe muju, iiniguquerecũ masa erã ñerire cóãmasibiriyoro. Goãm̄ure umupeomorãre õarã árĩcũ iimasibiriyoro iri doreri. ² Iri mera masa erã ñerire cóãcũ, yujusubu ta Goãm̄ure erã waim̄urã wejẽ di cóãra p̄hr̄u erã ñerire cóãpehosũboñuma. Eropirã irisubu majarã, “Dipuwaja mara guare,” arĩ pepiboñuma masa. Eropirã iripẽta dipaturi Goãm̄ure waim̄urã wejẽburire duhucãboñuma. ³ Õabirim̄uriñorã dohpa. Eropirã bojori n̄c̄u Goãm̄ure waim̄urãre wejẽ di cóãcũ masa erã ñeri dipuwajare guñaniguicãñorã. ⁴ Wec̄ua di mera, cabritoa di mera ne mari ñeri dipuwajare cóãmasiye mariyoro dohpa.

⁵ Iri eropa árĩcũ ñagu Cristo i yebaguere ñgu ariboro core õpa arĩp̄u Goãm̄ure ñgu Pagure:

Waim̄urãre erã soe muju ocũ, trigo pogare erã ocũ sãre m̄u ñagu ñhasuabeaa m̄h̄u. Eropigu masa dehyoacũ iib̄u m̄h̄u ȳre. M̄h̄u ȳre iira d̄up̄u m̄re mucubiricũ ȳu iiburi d̄up̄u árĩroca. ⁶ Ñerire erã cóãborore waim̄urãre wejẽ erã soe mujucũ ñagu ñhasuabirab̄u m̄h̄u. ⁷ M̄u eropa ñhasuabiricũ ñagu õpa arĩb̄u m̄re: “M̄u gamerire yebague ñgu wagura. Ȳu eropiiburire arĩ gojara ãhraa m̄u yare erã gojarapũgue,” arĩb̄u ȳh̄u, arĩm̄urip̄u Cristo ñgu Pagure.

⁸ Negohraguere Goãm̄u ñgu doreri waim̄urãre trigo poga sãre erã ori mera erã ñgure umupeodorequerecũ ta õpa arĩp̄u Cristo ñgure.

“Waimuräre soe muju erã ocũ, trigo pogare erã ocũ sãre gamebiribũ mũhũ,” arĩpũ ãgũ. ⁹ Eropa arĩtuhagũ õpa arĩnemopũ: “Mũ gamerire yebague iigũ wagũra,” arĩpũ. ãgũ eroparĩcũ õpa masia mari. Iribojegue Goãmũre erã ñerire cóãdorerã waimuräre wejẽ di cóãrare gohrotogũ iipũ Goãmũ. Eropa gohrotogũ Cristo ãgũ sĩridiro mera masare erã ñeri dipuwajare taugũcumi Goãmũ. ¹⁰ Jesucristo ãgũ dũpũre ogũ sĩrigũ árĩpehrerã mari ñero iirare cóãdigũ árĩmi. Yujusubu ta Goãmũre ãgũ dũpũre ogũ marire dipuwaja maricũ iidi árĩmi. Eropa iigũ Goãmũ ãgũ gamediro dopa ta iidi árĩmi.

¹¹ Árĩpehrerã pahia umuri nũcũ Goãmũre umupeori wihi mohmeniguima. Eropa mohmeniguirã muraro ta waimuräre wejẽ soe mujuma Goãmũre masa ñerire cãdijidoremorã. Erã eropa iiquerecũ ta erã ñero iirire cãdijibeami ãgũ. ¹² Cristopũ yujusubu ta mari ñeri dipuwajare sĩrigũ, mari ñero iirare õaro cãdijipehocãcũ iidigũ árĩmi. Iirire cãdijipehocũ iituha waha wapũ ãgũ Pagũ pohrogue ãgũ diayepũ doagũ wagũ. Opũ árĩgũ erogue doacumi. ¹³ Eroguere doagũ coregũ iimi. ãgũre ãhaturirãre ãgũ Pagũ ãgũ tarinũgabasaborore coregũ iimi. ¹⁴ Yujusubu ta ãgũ sĩridiro mera ãgũ coenirãre õarã ñeri mariro erã árĩniguicũ iidi árĩmi. Eropigũ Goãmũ pohro doami pare. ¹⁵ Jesucristo eropa iiboro core erã arĩ gojamũhtarare arĩ weremi Espĩritu Santo marire. Õpa arĩ weremi ãgũ:

¹⁶ Õpa arĩmi mari Opũ: “Pũhrũguere õpa arĩ

weregura Israe masare. ‘Yũ dorerire erã yũhridiacũ iigũ erã pepirigue apigura,’ arĩ weregura,” arĩmi ãgũ.

17 Õpa arĩnemomi Goãmũ:

“Erã ñero iirare dipaturi guñanemosome yũhũ,” arĩmi ãgũ, arĩ weremi marire Espĩritu Santo Goãmũ yare gojarapũgue.

18 Mari ñeri iirare ãgũ cãdijicũ dipaturi mari ñeri dipuwajare sĩribure gamebeaa mari.

Goãmũ pohro mari ejaro dopa ta ãgũ mera gũiro mariro mari wereniguimasia

19 Cristo ãgũ sĩriro mera ãgũ di cóãro mera mari sã dohpaguere gũiro mariro Goãmũ mera wereniguimasia. Eropirã ãgũre serẽmasia.

20 Iribojegue Goãmũ ãgũ árĩri taribugue Goãmũre serẽbu pahia opũ dihta ñajamasimi. Iri taribure Goãmũ árĩrore cãhmotara suhrirore ãgũ dihta tari ñaja serẽmasimi. Dohpague ta mari basi Goãmũ árĩro ñajaro dopa ta Goãmũre serẽmasia. Pahia opũ ãgũ iri taribugue ãgũ dire aĩ ñajaro dopa ta Cristopũ Goãmũ pohrogue ejapũ mari ñeri iirare cãdijidoregũ ejagũ. Eropa iigũ Goãmũ mera mari wereniguibodirore cãhmotadirore cóãdi árĩmi. 21 Goãmũ pohrogue serẽbasagũ mari Goãmũ yarã yagũ pahia opũ turatariagũ ãhrimi Jesucristo. 22 Eropirã, yũ acawererã, Cristo mari pahia opũ árĩcũ ãha mari Goãmũ mera wereniguimasirã árĩrã Goãmũre serẽrã. Diaye pepirã árĩrã, “Ãgũ yũhriçucumi,” arĩ umupeorã ãgũre serẽrã. Cristo mari ñerire ãgũ di mera coenirã ãhraa. Eropirã “Dipuwajacurã ãhraa,” arĩ pepirã

árĩbeaa mari. Eropirã guhrari mariri deco mera coeweasũnirã iro dopa ãhraa. Eropa árĩrã Goãmure serērã. ²³ “Muare taugura,” ĩgu arĩdiro dopa ta iigucumi. Eropirã ĩgu marire ĩgu tauborore õaro mucubirimũhtayua mari. Irire mucubirimũhtayurã ne cãdijibiricãrã. Goãmure eropa guñaturaniguicãrã. Eropa guñaturarã irire gajirãre wererã mari. ²⁴ Mari mera majarãre mahirã itamurã mari árĩpehrerã mari game mahi mari itamuboro dopa. ²⁵ Eropirã õaro gamenererã Goãmure umupeomorã. Gajirãpũ gamenerebeama Goãmũ yare buhemorã. Erã iiro dopa iibiricãrã. Mari mera majarãre Jesucristore umupeonemocũ iirã. I yebaguere mari Opũ ĩgu dujariboro merogã duhyaa. Irire masirã turaro itamurã mari mera majarãre, Jesu yarãre erã Jesucristore umupeorire.

²⁶ Diaye árĩri buherire mari masiquererã ta irire cóãrã ñerire mari eropa iiniguicũ, Jesucristo sĩrira mera mari ñerire cóãnemoboro ne mara. ²⁷ Eropiro eropa iirãre guhyaro dujaa. Árĩpehrerã ĩgure ĩhaturirãre dipuwaja moagu turaro mũjurogue cóãgucumi Goãmũ erãre. Eropirã ĩgu dipuwaja moaborore gũirã dihta ãhrima ĩgu yare cóãnirã. ²⁸ Moise dorerire tarinũganirãre dipuwaja moarã erãre wejẽmuriñorã. Ne mojomoro ĩaro mariro wejẽmuriñorã erãre. Ærerã erã ñero iirare weresãcũ peerã erã tarinũgarare masima. Ærerã maricũ perã erã ñero iirare weresãcũ peerã erãre wejẽmuriñorã Goãmũ dorero dopa ta. ²⁹ Erã iidiro tauro Goãmũ magure ĩhaturirã

dipuwaja moasũmorã árĩrãcoma. Cristo ïgu di cóaro mera marire mari ñeri iirare cóadi árĩmi Goãmũ. Ïgu eropa cóãborore wereyupũ ïgu. Eropirã ïgu cóãnirã erã árĩquererã ta, pũhrũ ïgu di cóãrare “Bu gohra ãhraa,” arĩrã ïgu dipuwaja moamorã gohra árĩrã ta iirãcoma. Eropa árĩrã Espĩritu Santore ñero arĩ wereniguirã áhrima. Ïgu erãre mahigu áhrimi. Erã eropa ñero wereniguicũ ïagu turaro dipuwaja moagucumi Goãmũ erãre. ³⁰ Goãmũ eropa iigu árĩgure masia. Goãmũ ïgu basi ta õpa arĩpũ: “Yũhũ ãhraa dipuwaja moabu. Erã ñerire iira dipuwaja, dipuwaja moagura yũhũ,” arĩpũ ïgu. Õpa arĩnemopũ: “Yaharãre ñero iirãre dipuwaja moagura,” arĩpũ ïgu, arĩ gojañuma ïgu yare gojarapũgue. ³¹ Goãmũ ojocarigu marire dipuwaja moacũ gũhyataria.

³² Iribojegue mũa árĩrare guñaque mũa. Irisubure Goãmũ yare ne masinugarã ñero tariquererã bajasuburi ñero tariquererã ne ïgu yare cóãbiribũ mũa. ³³ Yujuyerisuburi masa erã ïhuro gajirã mũare ñero arĩ, ñero pabirama mũare. Eropirã gajirã Jesu yarãre erã ñero iicũ ïarã erãre mojomoro ïabũ mũa. ³⁴ Erã Cristo yarã erã árĩra waja erã peresugue árĩrãre mojomoro ïabũ mũa. Eropirã mũa yare erã emaque-recũ ta mucubiriri mera “Õaroca,” arĩmũribũ mũa. I yeba maja tauro õarire umaroguere mũa opaburire masimũribũ. Iri õari pehrebiribore masibũ mũa. Irire masirã mũa oparire erã emacũ bujawerebiribũ mũa. ³⁵ Eropirã irire guñatura duhubiricãque. Goãmũre eropa umu-

peoniguicãque. Mũa eropa iira waja mũare ãaro iigũcumi. ³⁶ Goãmũ yare ãaro iiniguicãro gahmea ne duhuro mariro. Goãmũ yare iirã bocatiuro gahmea. Eropa iirã árĩrã ĩgu gamerire mũa iira pũhrũ ĩgu “Mũaare õpa ogũra,” ĩgu arĩ apirare oparãca. ³⁷ Õpa ãhraa Goãmũ yare erã gojarapũgue:

Merogã duh, ñero pabirama mũare. Eropiryaa Cristo ĩgu eraboro. Eropa eragu mata erapurumjugũcumi. ³⁸ Yaharã ãarãpũ yũre umupeoniguicãrãcoma. Eropirã yaharã árĩniguicãrãcoma. Yũ mera eropa árĩniguirãcoma. Yahare cóãnirãpũre ĩhasũasome yũhũ, arĩmi Goãmũ, arĩ gojañuma.

³⁹ Maripũ Goãmũ yare cóãrã árĩbeaa mari. Eropirã peamegue wamorã árĩbeaa mari. Goãmũre umupeoa mari. Eropirã ĩgu taunirã ãhraa ĩgu pohro wamorã.

11

Umupeorire wererũ

¹ Õpa ãhraa umupeori: Goãmũre umupeorã, marire ĩgu ãaro iiburire ãaro masia. ĩgũre ĩabiriquererã ĩgũre umupeorã “Diaye ta iigu ãhrimi,” arĩ pepia mari. ² Iribojegue majarã Goãmũre “Diaye ta iigu ãhrimi,” erã arĩ umupeocũ ĩagu ĩhasũarũ Goãmũrũ.

³ Goãmũ ĩgu wereniguirĩ mera árĩpehrerire ĩhacũnugurũ. Eropigu ĩgu mari ĩabirirare árĩpehrerire mari dohpague mari ĩari sãre

ĩhacũnugupũ. Irire mari õaro masia Goãmũre umupeorã.

⁴ Goãmũre umupeogũ Abelpũ cordero wejẽ, soe mujupũ Goãmũre umupeogũ. Eropa iigu ĩgũ tĩgũ tauro õaro umupeorũ ĩgũ Goãmũre. Eropigũ Goãmũ ĩgũ orare mucubĩripũ. Eropa mucubirigũ “Õagũ ãhrimi,” arĩ ĩapũ ĩgũ Abelre Goãmũre umupeogũre. Abel iribojegue sĩridigũ mũrũ árĩquerecũ ĩgũ Goãmũre eropa ii umupe-orare guñaa mari sã. Eropa guñarã. Goãmũre umupeoa mari sã.

⁵ Enoco Goãmũre ĩgũ umupeocũ ĩagũ mucubirimũripũ Goãmũ. Eropa mucubirigũ ĩgũre ĩgũ pohrogue aĩmũriapũ. Eropa ta werea Goãmũ yare wereniguirire erã gojarapũgue. ĩgũ eropa aĩmũriara pũhrũ masa ĩgũre ne bocabiriñorã. ĩgũ eropa aĩmũriadigũ árĩgũ ne sĩribiripũ. ⁶ Goãmũre umupeobirã ĩgũre mucubiricũ iimasibea mari. Goãmũre serẽdiarã õpa ĩgũre arĩ pepiro gahmea marire. “Diaye ta ĩgũ Goãmũ gohra ãhrimi. Eropigũ ĩgũre mari umupeocũ marire õaro iimi ĩgũ,” arĩ pepiro gahmea. Mari eropa arĩ pepibirã mari ĩgũre serẽmasibea.

⁷ Noé Goãmũre umupeogũ ĩgũre ĩgũ wererare õaro yũhrĩpũ. Pũhrũ erã ñero waborore Goãmũ ĩgũre werecũ peegũ õaro yũhrĩpũ ĩgũ. Eropa yũhrigũ wuadiru dohodiru iipũ ĩgũ acawererã dia miririñere tarimorã. Noé eropa umupeogũ árĩgũ i yeba majarã ñerã erã umupeobirirare, erã taribiriboro sãre ĩhmũgũ iimũripũ. Eropigũ ĩgũ umupeocũ ĩagũ “Õagũ ãhrimi,” arĩ ĩamũripũ Goãmũ ĩgũre.

8 Abrahã sã Goãmure umupeogu ïgure yũhrípũ. Gaji yebaguere ïgure ïgu oburi yebaguere Goãmũ ïgure wadorecũ ïgure yũhrípũ. ïgu ya yebare wirigãgu ïgu masibiriri yebague ejarũ. 9 “I yebare mure ogura,” Goãmũ ïgu arĩcũ peegu ïgure umupeogu iri yebague eja árĩmerejarũ ïgu. Ero arĩmerejaqueregu ïgu gaji yeba majagu árĩro dopa waimurã gasiri wiri mera wihicũ curimurípũ murano árĩbirinijagu árĩgu. ïgu magũ Isaa sã ïgu pãrami Jacobo sã ïgu iiro dopa ta iimuriñorã. “Mure i yebare ogura,” arĩ weremurípũ Goãmũ erã sãre. 10 Eropigu i yebare curigu macari iibirimurípũ Abrahã. Gaji macague Goãmũ ïgu árĩri macague umarogue ïgu waborore coregu iipũ Abrahã. Iri maca Goãmũ iira macaũ. Eropigu ïgu umupeocũ ï arĩyoro. Eropigu iri macare ne pehrebiriburi macare coregu iipũ.

11 Goãmure umupeogo Sara waĩcũgo, buro gohra árĩquerego porã marigo árĩquerego ta porãcũpo. “Goãmũ ïgu arĩdiro dopa ta iigũcumĩ,” arĩgo ïgure umupeogo porãcũpo. 12 Eropigu Abrahã bugu gohra árĩqueregu ta porãcũpũ. Eropirã ïgu pãramerã árĩturiarãgue bajarã wacãñorã. Necãre, imipa yerire mari queorã yujuro bojeya mariro dopa ta, ïgu pãramerã árĩturiarã sãre queo bocatũuya mariñorã.

13 Árĩpehrerã oã yũ werenirã murague Goãmure umupeotuhajanirãgue sĩriñorã. Goãmũ “Mure ogura,” ïgu arĩrare opanibirãgue sĩriñorã. Eropa opabiriquererã

“Goãmũ ãgũ arĩdiro dopa ta pũhrũgue ogũcumi gũare,” arĩ masiñorã. Eropã masirã mucubirimũhtañorã. Eropirã õpa arĩñorã erã: “I yebague curirã ãhraa. Gaji yeba majarã ãhraa,” arĩmũriñorã erã. ¹⁴ Eropã arĩrã gajã yebare erã ya yeba árĩborore corerã iĩñorã. Irire õaro masia mari. ¹⁵ “Gajã yeba majarã ãhraa,” erã arĩrã iribojegue erã cóãra yebare guñarã iibiriñorã. Iri yebague dujaa wadiarã dujaa waboñuma. ¹⁶ Õari yebapũre gahme corerã iĩñorã. Iri yeba umarogue ãhraa. Erã eropa gahme corecũ ãagũ Goãmũre “Gũa opu ãhrimi,” erã arĩcũ peegũ ne gũhyasĩribiripũ Goãmũ. ãgũ pohro erã ya maca árĩborore iibasatuhadi árĩmi ãgũ. Eropigũ gũhyasĩribiripũ.

¹⁷⁻¹⁸ Goãmũ Abrahãre ãgũ magũre Isaare wejẽ soe mujudorepũ. ãgũre ãadiagũ eropa dorepũ, “¿Diaye ta yũre umupeori?” arĩgũ. Eropigũ Goãmũre umupeogũ ãgũ arĩdiro dopa ta iiripũ Abrahã. “Mũ magũ Isaa mera mũ pãramerã árĩturiarãre opagũca mũhũ,” Goãmũ ãgũ arĩdiro árĩquerẽcũ ãgũ magũre wejẽbu iiripũ Goãmũ dorero dopa ta. ¹⁹ “Yũ magũre Isaare yũ wejẽcũ Goãmũ ãgũre masugũcumi,” arĩ pepigũ ãgũre wejẽbu iiripũ. Eropigũ Goãmũ ãgũre cãhmota ãgũre wejẽdorebiripũ. ãgũ pagũ ãgũ eropa wejẽbu árĩgũ Isaa sĩribudigũ árĩpũ. Eropigũ sĩridi masadigũ iro dopa árĩpũ ãgũ. Eropigũ Abrahã ãgũre ojocarigũ dipaturi opapũ ãgũre.

²⁰ Isaa Goãmũre umupeogũ ãgũ porãre Jacobore, Esaú sãre “Pũhrũgue Goãmũ mũare õaro iigũcumi,” arĩpũ.

21 Goãmure umupeogu Jacobo ïgu sïriboro coregã wahgãnugaja ïgu tuadigu mera tuañanugaja Goãmure serë umupeorũ. Eropa serëgu José porãre umare “Goãmũ mũare ðaro iigucumi,” arïpũ Jacobo.

22 Goãmure umupeogu José ïgu sïriboro coregã Israe masa Egipto árĩrã erã wiriaborore weremũhtarũ. Eropa erã wiriaborore masiyugu ïgu sïrira dũpũ mũrarore aïgãdorepũ ïgu porãre.

23 Goãmure umupeorã urerã abe gohra Moiserere dibuñorã ïgu pagũ sumarã ïgu masa dehyoara pũhrũ. Óagugã ïgu árĩcũ ïarã ïgugãre dibuñorã. Iri yeba majagu tauro árĩgu opu ïgu majirãre wejëdorerire tarinugarã ïgure dibuñorã erã. Erã erã opure gübiriñorã.

24 Moiserere masudigo i yeba majarã opu mago árĩpo. Eropa igo masudigu árĩqueregu, Goãmure umupeogu “Opu mago magũ ãhrimi,” erã arï piyucũ gamebiripũ ïgu Moise. Oparã mera majagu árĩdiabigu Goãmũ yarã mera majagu árĩdiapũ.

25 Goãmure tarinugadiagu árĩgu ïgure masudigo pohrogue bajamenurigã ðaro árĩboñumi. Eropa ðaro árĩbu árĩqueregu ïgu Goãmũ yarã mera ñero taridiapũ. 26 Eropigu Egipto majarã ya ðarire tauro Cristo ya árĩburire ñero tariburire gamepũ. Pũhrugue Goãmũ ïgure ïgu ðarire oborore masigu ñero taridiapũ.

27 Goãmure umupeogu Egipto majagu tauro opu, ïgu mera ïgu guacũ güibiripũ. Eropa güibigu iri yeba árĩdigũ iri yebare cóãcã waha warũ. Goãmure ïabiriqueregu “Goãmũ árĩcumi,” arï

peripɪɸ ɪɸ. Eropigɸ ɪɸ iiborore ne duhubiripɸ.

²⁸ Goãmɸre umupeogɸ Moise Israe masare Goãmɸ ɪɸ tauborore masipɸ. Eropa masigɸ Goãmɸ ɪɸ dorediro dopa ta Israe masa erã disipororire erã tura mijirire di mera wejēsiri tuhdorepɸ. Eropa dorepɸ anyu masare wejēgɸ erã masa tĩrãre wejēbodigɸ Israe masa erã masa tĩrãre wejēbiriboro dopa. ²⁹ Goãmɸre umupeorã Israe masa deco diariya waĩcɸriya deco watope árĩri maha deco mariri maha taribujañorã. Erã eropa taribujacũ ĩarã Egipto majarãpɸ erãre nɸɸsiarã erãre ĩhacũ taribujanirã miri sĩria wañorã.

³⁰ Goãmɸre umupeorã Israe masa Jericó maca sãriro, wɸari sãriro pɸɸpɸ majisora curiñorã. Siete nɸri gohra iri macare majisora curiñorã erã. Iri nɸcɸ nɸri erã majisorara pɸhɸ iri sãriropɸ dijapehrea wayoro. ³¹ Iri maca majago ɸma mera ñero iidigo Rahab waĩcɸgo Goãmɸre umupeogo Israe masare itamupo. Iri macare erã cóãboro core bajamerãgã Israe masa erogue erã ñaja duhricũ ĩha igo erãre itamupo. Eropirã Israe masa iri maca majarãre Goãmɸre tarinɸganirãre wejēpehoquererã ta igopɸre wejēbiriñorã.

³² Gajirãre Goãmɸre umupeonirãre werenemoboya yɸhɸ. Eropa werediaqueregɸ ta bajarãre eropa Goãmɸre umupeorã sãre were gojapehomasibirica yɸhɸ. Gedeõ, Baraca, Sansõ, Jefte, Davi, Samue, Goãmɸ yare weremuhtanirã sã árĩpehrerã yɸ werebonirã ãhrima. ³³ Goãmɸre umupeorã yujurãyeri gaji yebarigue árĩri macari majarãre gamewejē tarinɸgañorã.

Eropirã gajirã diaye dorenirã árĩñorã. Gajirã Goãmũ erãre “Mũare itamugũra,” ĩgu arĩdiro dopa ta ĩgu itamurire bocañorã. Eropa ĩgũre umupeorã yeea erãre badiacũ erãre erã babiricũ iĩñorã erã. ³⁴ Turaro ũjũri peameri árĩquerecũ ta ũjubiriñorã erã Goãmũre umupeonijarã. Gajirã erãre ñose wejẽdiacũ duhriã wañorã erã Goãmũre umupeorã. Turabirã árĩquererã Goãmũre umupeo, turarã wañorã. “Goãmũre umupeorã ãhraa. Gamewejẽ turarã ãhraa,” eropa arĩrã árĩcũ gaji yebari majarã surara erã wejẽrã arirã ne yujuro bojebiriñorã. ³⁵ Goãmũre erã umupeocũ ĩagũ yujurãyeri nome erã acawererã sĩricũ ĩagũ Goãmũpũ erãre masupũ.

Gajirãpũre “Goãmũre gamebiricãque,” erã arĩ peresu iicũ erãpũ Goãmũre duhudiabiriñorã. “Mũa Goãmũre duhucũ mũare taurãca,” arĩñorã erãre. Erãpũ duhubiriñorã Goãmũ mera erã õaro masaborore gamerã. Eropirã erãre erã ñero iicũ sĩria wañorã. ³⁶ Gajirãre Goãmũre umupeorãre ñero arĩ wereya erãre tãramuriñorã. Eropirã gajirãre guburire, mojotorire diricãa peresu iĩñorã. ³⁷ Goãmũre umupeorãre ñerã utã mera dea wejẽmuriñorã. Gajirãre erã dupũre seroti mera wiritamuriñorã. Gajirãre ñoserimijiri mera ñose wejẽmuriñorã. Erãre Cristore cóãdorerã erã ñero iimuriñorã. Gajirã erãre ñero iicũ oveja gasiri mera, cabra gasiri mera suhricũrã mojomorocũrã árĩmuriñorã. ³⁸ Erã õatararã erã árĩcũ i yeba majarã ñerã erã mera majarã árĩbonirã árĩbeama. Wiri marirã arĩrã, masa marirogue utã yucũgue árĩgãri

siaricãmuriñorã. Eropã áringãri siarirã utã yucague árii goberigue, yebague árii goberisãre carĩgãri siaricãmuriñorã. ³⁹ Oã áripehrerã Goãmure erã umupeocũ ãgũ mucubiripũ ãgũ. “Ôaro iabũ mã,” arĩpũ. Erã eropa ôaro umupeoquerẽcũ Goãmũ erãre “Mãare taugũra,” ãgũ arĩdiro ejanibiriya dohpa. ⁴⁰ Ôpa arĩ pepipũ Goãmũ: “Oãre yaharãre, pũhrũgue áriã yaharã mera yujuro mera taugũra,” arĩ pepipũ. ãgũ eropa arĩ pepidiro dopa ta iigũcumĩ. ãgũ eropiicũ ôatariaro áriroca ero core ãgũ iidiro tauro.

12

Jesure eropa umupeoniguicãrã mari

¹ Eropirã oãre yũ werenirãre bajarã Goãmure umupeonirãre, ñerire iibirinirãre masirã áripehreri ñero iirire duhucãrã mari sã. Ôpa ãhraa mari queoriñe mera werecũ: Nũcũrĩre opagũ omari masũ turaro omamasibeamĩ. Eropã ta mari Goãmũ gamerire iimasibeaã mari ñerire iicũ. Eropirã irire duhucãrã mari. Eropirã Goãmũ ãgũ gamero dopa ta ôarire iiniguicãrã. ² Eropirã Jesure eropa guñaniguirã. ãgũ ta ãhrimi marire umupeo guñaturacũ iigũ. Eropigũ marire umupeonemocũ sãre iimi ãgũ. Crusague sĩrigũ yujuro bojerũ. Pũhrũ ãgũ mucubiriborore masigũ crusague sĩripũ. Eropã sĩrigũ gũhyasĩribodigũ áriquerẽgũ gũhyasĩribiripũ ãgũ. Eropã iira pũhrũ dohpaguere Goãmũ ãgũ opũ ãgũ doaro diayerũ doanijagũ ãgũ dorebu iimi.

³ Ñerã masa ïgure ñero erã iicũ yujuro bojerũ ïgũ. ïgũ eropa iidigure guñaque mũa, mũa sã ñero tarirã “Yujuro bojebiriboca,” arĩrã. Irire guñaque mũa ïgure umupeo duhuri arĩrã.

⁴ Ñerire mũa tarinugaboro dopa Jesu iro dopa ñetariaro gohra tarinibea mũa. Ñerã mũaare wejẽnibeama. ⁵ ¿Goãmũ mũaare ïgũ porãre ïgũ wererare cãdijicãri mũa? Õpa arĩpũ ïgũ:

Yũ magũ, yũhũ mũre werecũ eropa pepicãbita.

Yũhũ mũre turicũ peegũ bujawerebita.

⁶ Áripehrerã yũ mahirãre werea. Eropigũ áripehrerã “Yũ porã ãhraa mũa,” yũ arĩ ïarãre tarinugadorebeaa. Eropigũ erã tarinugacũ ïha erãre yũ porãre merogã dipuwaja moaa, arĩpũ Goãmũ.

⁷ Ñero tarirã yujuro bojeque “Goãmũ yũre weregũ iimi,” arĩrã. ïgũ yare duhubiricãque. Goãmũ mũaare ïgũ porãre merogã dipuwaja moagũ iimi. Erã pagũ sũmarã erã porãre eropa werema. Eropirã erãre dipuwaja moama. Eropa ta iimi Goãmũ sã marire ïgũ porãre. ⁸ Goãmũ áripehrerãre weremi. Goãmũ mũaare ïgũ werebiricũ ïgũ porã gohra áribeaa mũa. Eropirã ïgũ porã áribirã yujugũ majigũ ïgũ pagure ïgũ masibiro dopa ta ïgũ weresũya marigũ arĩro dopa ta ãhraa mũa. Eropirã Goãmũre “Yũ pagũ gohra ãhrimi,” arĩmasibea mũa ïgũ mũaare werebiricũ. ⁹ Mari pagũ sũmarã marire erã werecũ peerã erãre umupeoa mari. Mari pagũ sũmarãre mari umupeoro tauro umupeoro gahmea mari Pagũ Goãmũ ïgũ werecũ. Eropirã ïgure yũhriro gahmea marire. Eropa yũhrirã áripehrerinũri

ĩḡu mera árĩrãca. ¹⁰ Bajamenurigã mari pagu sũmarã erã gamero dopa marire were dipuwaja moama. Goãmuru marire õaro weremi. Eropigu ĩḡu masiri mera marire dipuwaja moami marire õarã masadoregu. Eropa iimi ĩḡu marire ĩḡu iro dopa õarã mari árĩboro dopa. ¹¹ Marire ĩḡu dipuwaja moacũ mucubiribea mari. Mari bu bujawerea. Eropa bujawerequererã ta ĩḡu eropa dipuwaja moara puru õarã árĩrãca mari. Eropirã ĩḡu wererire peenirã árĩrã gajiropa iiro mariro õaro árĩrãca.

Goãmũ marire ĩḡu dorerire mari yũhribiricũ guhya ãhraa marire

¹² Eropirã guñaturabirã árĩquererã ta Goãmure õaro guñaturarã árĩque. ĩḡure duhubiricãque. ¹³ Õaro diaye maja mare mua waro dopa ta pee gorowerero mariro õaro diaye ta Goãmure yũhrique. Mua eropiicũ ĩhacũrã gajirã Jesu yarã gajiropa árĩrãre iisome. Eropirã turabirã turarã warãcoma.

¹⁴ Árĩpehrerã masa mera õaro árĩque gamequeãro mariro. Eropirã ñero iibiricãque. Ñeri marirã dihta mari Opũ Cristore ĩarãcoma.

¹⁵ Õaro iique mua. Goãmũ muare ĩḡu itamucũ õaro yũhrique. Ñeri tiari iri oterire iri goroweoro dopa ta mua sã Cristo yare duhu ñerire guñaniguibiricãque gajirãre goroweorĩ arĩrã. ¹⁶ Ne nome mera ñero iirã árĩbiricãque. Eropirã Goãmũ yare gamebirã árĩbiricãque. Eropa árĩḡu árĩru Esau. ĩḡu masa tĩḡu árĩripũ. Eropigu ĩḡu pagu yare ĩḡu sĩrira puru opabu

árĩripũ. Eropa árĩqueregu yujunũ barire gametarigu iri bari mera ĩgu pagũ magũre ĩgu tĩgu opaborore bu gohrotopũ. ¹⁷ Pũhrũ ĩgũre warare masia mũa. ĩgu eropiira pũhrũ ĩgu pagũ ĩgũre Esaũre õaro árĩdoreburire Goãmũre serẽbasarire turaro gameripũ daja Esaũpũ. ĩgu eropa gamequerecũ ta ĩgu pagũ magũpũre ĩgu tĩgu opaburire gohrotoira dipuwaja ĩgjiropa árĩrire iisome. Eropirũ pagũ ĩgũre obiripũ. Eropa gamegu turaro orequeregu ĩgu pagũre serẽqueregu irire opamasibiripũ Esaũ.

¹⁸ Goãmũ dorerire Moiserẽ ĩgu apicũgue mari acawererã Israe masa mũra Goãmũ pohro ejaboro guhya árĩyoro. Dohpaguere mũapũre eropa árĩbeaa. Õpa wayoro erãre. Goãmũ ĩgu dorerire Moiserẽ iri dorerire apigu erã árĩri yeba majagu utãguẽue árĩpũ. Irigapũ Sinaí waĩcũdigũ árĩyoro. Eropiro erã Goãmũ pohro ejamorã irigũgue erã ejacũ turaro peame ũjũyoro. Eropiro naitĩaro, imica curu, turaro miru sã árĩyoro irigu utãgũre. ¹⁹⁻²⁰ Eroguẽ erã ejacũ corneta bũsũyoro. Eropiro werenigu-iro cariyoro. ĩgu eropa wereniguri ejaricũcũ peerã masa yujuro bojebiriñorã. Goãmũ erãre guhyaro mera õpa arĩ dorepũ erãre: “Árĩpehrerã irigu utãgũre pẽhrerãre utã mera dea wejẽque erãre. Irigu utãgũre pẽhregũ waibũgu gohra ĩgu árĩquerecũ ĩgu sãre utã mera dea wejẽcãque. O ñoserimiji mera ñose wejẽque ĩgũre,” arĩpũ Goãmũ. ĩgu eroparĩcũ peerã yujuro bojebiriñorã erã. ²¹ Eropigu árĩpehrerire utãguẽuere guhyaro árĩrire ĩagu

õpa arĩpũ Moise: “Bũrigã güigũ naragãgũ iiaa,” arĩpũ ïgũ.

²² Iribojegue Israe masa Goãmũ ïgũ árĩdigũ utãgugue ejamasibiriñorã sĩriri arĩrã. Doh-paguere mũapũ Jesu yarãpũ Goãmũ árĩdigũ utãgugue, Siõn waĩcũdigugue, umaro majagugue mũrijarõ dopa ta diaye ta Goãmũ mera wereniguimasia. Goãmũ ojocarigũ ïgũ ya macague mũrijarõ dopa ta diaye ta ïgũ mera wereniguia mũa. Iri maca gajĩ maca mama maca Jerusalén umaro maja maca ãhraa. Ero anyua bajarã gohra ãhrima. Goãmũre umupeorã mucubiriri mera gamenererã ãhrima.

²³ Eropirã mũapũ ïgũ ya maca majarã árĩrã, erogue Goãmũ porã árĩmũhtarã mera mũa gamenere árĩbodiropõ dopa ta ãhraa. ïgũ porã erã waĩre ïgũ gojaturapũgue umarogue erã waĩre gojatunirã ãhrima. ïgũpũ mari Pagũpũ árĩpehrerã beyebu ãhrimi. ïgũ mera majarã ãhraa mũapũ. Eropirã gajirã õarã Goãmũ yarã mera gamenererã dopa ta ãhraa mũa sã. Erãre ta ñeri marirã iituhapũ Goãmũ.

²⁴ Eropirã Jesu mera majarã ãhraa mũapũ. Negohraguere ïgũ dore apirare gohrotogũ “Mũare õaro iigũra yũhũ,” arĩ apipũ Goãmũ marire. ïgũ erõpa arĩ apidiropõ dopa ta iidigũ árĩmi Jesu. ïgũ dire cohã ïgũ sĩrirañe mera marire õaro taricũ iimi ïgũ. Abelre ïgũ di cóãrare ïagũ Goãmũ Abelre wejẽdigũre dipuwaja moapũ. Jesucristo ïgũ di cóãrapũre ïagũ marire dipuwaja marirã árĩcũ iipũ. Eropiro Abel ïgũ di cóãra bu gohra árĩya. Cristopũ ïgũ di cóãra pũhrũ õatariaro

iipɯ Goãmɯ marire. Eropiro Cristo ĩɯ di cóãra bu gohra árĩbiriya.

²⁵ Eropirã õaro iique mɯa. Goãmɯ yare mɯare weregure õaro yũhrirã árĩque. Iribojegue i yeba árĩdigɯ Moise Goãmɯ yare ĩɯ werecũ peerã, bajarã irire peediabiriñorã. Erã eropa peediabirira dipuwaja, dipuwaja moapɯ Goãmɯ erãre. Erã tauro dipuwaja moagɯcumi Cristore cóãrãre. Cristopɯ ɯmarogue árĩɯ Goãmɯ yare weregɯ ãhrimi. ²⁶ Irisubure Moisere ĩɯ dorerire ĩɯ apirasubure Goãmɯ ĩɯ wereniguiro mera yeba ñohmecũ iipɯ. Dohpaguepɯre õpa weremi ĩɯ: “I yeba ñohmecũ yujusubu ta iinemogɯra. I yeba dihta ñohmecũ iisome yũɯ. ɯmarogue sãre ñohmecũ iigɯra,” arĩ werepɯ ĩɯ. ²⁷ “I yeba ñohmecũ yujusubu iinemogɯra,” arĩɯ, “Árĩpehrerire yũ ĩhacũnugurare cóãgɯra,” arĩɯ iipɯ. Goãmɯ ĩɯ opɯ árĩroguerpɯre cóãmasiya mara. Eropiro ĩɯ ĩhacũnugurare ĩɯ cóãcũ ĩɯ opɯ árĩro dihta dujaroca. ²⁸ ĩɯ opɯ árĩroque warãca mari. Eropirã ĩɯ opɯ árĩrore ĩɯ cóãbiricũ ĩarã, Goãmɯre “Õhaa,” arĩrã mari. Eropirã umupeori mera, gũhyadiaro mera ĩɯ yare iirã mari ĩɯre mucubiricũ iimorã. ²⁹ Peame ẽjaro gũhyaro dopa ta Goãmɯ gũhyaro dipuwaja moagɯ ãhrimi. Eropirã ĩɯre gũhyadiaro mera umupeorã.

13

Õpa Goãtɯre mucubiricũ iique

1 Mũa mera majarãre mahi duhubiricãque.

2 Masa mũa masibirã áríquerẽcũ erãre ôaro mera mũa ya wirigue ñajaridoreque. Gajirã eropirã, masibiriquererã anyuare erã ya wirigue ñajaridoreñorã. Eropirã mũa sã eropa ta iique.

3 Peresu árírãre mojomoro ãaque. Mũapũ erã mera peresugue árírã mũa áríboro dopa ta erãre mojomoro ãaque. Gajirã erã ñero tarirã sãre mojomoro ãaque. Erã iro dopa mũa sã ñero tariro dopa ta erãre mojomoro ãaque.

4 Mũa mojoto dirinirãre árípehrerã ôaro game umupeoque mũa. Eropirã mojoto dirinirã gajirã mera ñero iirã áríbiricãque. Árípehrerã uma nome mera ñero iinirãre, nome uma mera ñero iinirã sãre dipuwaja moagũcumĩ Goãmũ.

5 Niyerure gamerã ne áríbiricãque. Ôpa arĩpũ Goãmũ: “Mũare ne cóãsome. Eropa itamuniguigũra,” arĩpũ ãgũ. Eropirã mũa opari mera iripêta mucubirique. Wũaro gamenemobiricãque. 6 Eropirã güiro mariro ôpa arĩ pepirãca marmera mũa ya wirigue ñajaridori:

Mari Opũ marire itamugũ ãhrimi. Eropirã ne güisome mari. Masa marire erã ñero iiborore güisome mari, arĩ pepirãca mari.

7 Goãmũ yare mũare werenirãre mũare dorenirãre guñaque mũa. Eropirã ôaro erã áríricũrãre guñaque. Eropa guñarã, Cristore erã umupeorare ãhacũque mũa.

8 Jesucristo ne gohrotobeami. Iribojegue, dohpague sãre, pũhrugue sãre ãgũ árídiro dopa ta árínicũicãgũcumĩ ãgũ. 9 Baja buheri

gajiropa áriri buherire peebiricãque òari buherire guague cohãri arĩrã. “Ire baque. Ire babiricãque,” arĩ buhemaacãma gajirã. Eropa arĩrire mari yãhricũ iri marire itamubeaa. Eropiro eropa arĩ buherire mari iicũ bu gohra ta ãhraa. Iri marire guñaturarã árĩcũ iibeaa. Goãmũ marire guñaturacũ iimi.

¹⁰ Cristo mari ñeri dipuwajare sĩridi árĩmi mari ñerire cóãbu. Pahiapũ òpa arĩrã ãhrima: “Waibũgũ yũ Goãmũre wejẽ soe mujucũ, Goãmũ mera tarigũca,” arĩrã iirima erã. Eropa arĩrã erã ñeri iirare ne cóãnrã árĩmasibeama. ¹¹ Pahia opũ Goãmũ ĩgũ áriri taribu gohrague waibũgũ wejẽdigũ dire aĩ ñajagũ Goãmũre ópũ masa erã ñerire cóãdoregũ. Eropigũ ĩgũ wejẽdigũ waibũgũre iri maca turogue soe cóãcãñorã.

¹² Eropa ta Jesu sã maca turogue sĩripũ. ĩgũ di cóãri mera masa ñeri marirã wacũ iibu sĩripũ. ¹³ Maca turogue ĩgũ sĩricũ ĩarã, erã buherire ĩgũ cóãcũ ĩarã judio masa ĩgũre ĩhaturĩñorã. Eropirã mari sã ĩgũ mera majarã árĩrã. Mari eropa árĩcũ ĩarã masa mari sãre ĩhaturirãcoma. ¹⁴ Erã marire ĩhaturiquerecũ ãhraa. I yebague mari árĩwajaburi maca árĩbeaa. Mari pãhrugue árĩburi macare corerã iiaa mari. ¹⁵ Eropirã Jesu ĩgũ itamuro mera ĩgũ Pagũ mera wereniguia mari. Eropirã ĩgũre òaro serẽniguicãrã. “Mari Pagũ turagũ ãhrimi,” arĩ umupeoniguirã gajirãre wererã. Mari eropa arĩ werecũ ĩgũ mucubirigũcumi. ¹⁶ Mũa mera majarãre òaro iique. Mũa oparire gajirã sãre oque. Irire cãdijibiricãque. Mũa eropa òaro iirã Goãmũre umupeorã iica. Eropa iirã ĩgũre

mucubiricũ iirãca.

¹⁷ Mũa oparãre ðaro yũhrique. Erã dorero dopa ta yũhrique. Goãmũa mũare ìhadibu buhedoregũa apimi erã oparãre. Ìgũa eropa apinirã árĩrã eropa mũare ìhadibuniguirã iima Goãmũre tarinũgadiabirã. Eropirã erãre ðaro yũhrique mũa erã mucubiriri mera mũare itamuboro dopa ta. Mũa yũhribiricũ ìarã erã bũjawererãcoma. Eropa yũhribirã ðaro árĩsome mũa.

¹⁸ Gũare serẽbasaniguique Goãmũre. Ʋmũri nũcũa ðari dihtare iidiaa gũa. Eropirã “Ñerire iirã iiaa,” arĩ pepibeaa gũa. ¹⁹ I tamerare turaro serẽbasaque Goãmũre yũre: Yojarõ mera yũ mũa pohroque wamasiborore serẽque Goãmũre.

Ipũ gojabeodigũa ðadoretupũa

²⁰ Goãmũa marire ðaro árĩcũ iigũa ãhrimi. Ìgũa mari Opũa Jesucristo sĩridigũre masupũa. Ìgũa “Mũare ðaro iigũa,” marire arĩ apidigũa ãhrimi. Ìgũa eropa arĩrare iinijagũa Jesupũa marire taugũa ãhrimi. Mari ñeri dipuwajare ìgũa di cohã sĩripũa ìgũa. Eropigũa ìgũa turagũa, ovejare ìhadibugũa ìro dopa árĩgũa, marire ìgũa yarãre ðaro ìhadibumi.

²¹ Eropigũa Goãmũa ìgũre masudigũa mũa sãre itamuporo árĩpehreri ìgũa gamerire mũa iiboro dopa. Eropigũa Jesucristo ìgũa itamuri mera Goãmũa ìgũa gamero dopa ta árĩpehrerã marire ðarire gohrotocũ iiporo. Eropirã árĩpehrerinũri Cristore umupeorã. Eropa ta iirã.

²² Yũ acawererã, ire turaro mũare doregũa: Ipũ mũare yũ wererare ðaro mera peeque mũa. I yũ mũare gojabeoripũ wũaripũ árĩbeaa.

Eropirã ire õaro peeque. ²³ I sãre mware weregura: Mari acaweregure Timoteore peresu arĩdigure wiuañorã. Dohpagohragã ãgu aricũ yũhũ ãgu mera mware ãagu wagura.

²⁴ Mwa oparãre, arĩpehrerã gajirãre Goãmũ yarãre ero arĩrãre õadorea. Italia majarã Jesu yarã sã mware õadorema.

²⁵ Arĩpehreri mera Goãmũ mware õaro iiporo. Eropa ta iiporo. Iripẽta ãhraa.

Goãmu Yare Wereripu

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1